

# TRAICTE DE LA PESTE,

2

Composé par  
Maistre François Valleriole  
Docteur en medecine.

*Duquel Voyez le sommaire en la  
page suivante.*

VIRTYE DVCS,



CONITE FORTVNA.

A LYON,  
PAR ANTOINE  
GRYPHIVS.  

---

1566.



TRAICTE de peste, conte-  
nant la nature, causes, signes, & ac-  
cidens d'icelle : avec la curation de la  
siebure pestilentielle, bubons & char-  
bons pestilentiels.

Plus,

L'ordre & police que l'on doit te-  
nir aux villes infectes pour conseruer  
leurs citoyens en santé, les preseruer à  
n'en courir le danger de peste. Et sur ce  
plusieurs & singuliers remedes pre-  
seruatifs.

3

A TRESNOBLES,  
TRESVERTVEUX ET  
tresprudens seigneurs Messieurs  
les Consuls & Conseillers d'Ar-  
les, François Valleriolo Docteur  
en Medecine, Salut.



*Messieurs, le souverain des  
Orateurs Latins Cicero en  
ses livres des Offices vou-  
loit enseigner aux homes*

*en quoy l'honesteté de la vie doit estre  
colloquée, dit icelle en ce principalemēt  
reluire, que l'homme sans cesse soit en  
devoir, ou estant en affaires & admi-  
nistration publique, ou en son privé: ou  
negociant avec ses amis, ou bien retiré  
en soy-mesme. Car l'ornement de la  
vie de l'homme est le continuel exerci*

ce du debuoir qu'il doibt à soy & au-  
truy. Or entre tous les offices n'en y a  
pas vn plus excellent ny plus digne de  
l'homme que proffiter au public, pour  
lequel conseruer & ayder semble que  
la nature nous ait produit, comme co-  
adiuteurs de la conseruation de l'uni-  
uers. Et par-ce à bonne raison le diuin  
Philosophe Platon disoit, nul de nous  
n'estre né pour soy mesme, ains pour ay-  
der la Republique, les parens & amis:  
en quoy veritablement consiste le sou-  
uerain & plus saint deuoir de l'hom-  
me. Car ce faisant il se rend digne du  
titre & nom qu'il porte, il illustre sa  
dignité par les vertueuses actions qu'il  
exerce plus pour l'vtilité publique, que  
pour soy, & rend à la posterité fidelle  
tesmoignage de sa versation en ceste  
vie caduque & mortelle. Ce que par

ce sage Caton à esté tresdoctemēt dit,   
 en chacun deuoir rendre cōte non seu-   
 lement de ses œuures & actions, ains   
 de son reposer priuē & solitaire, pour   
 monstrier qu'en nulle partie de la vie   
 de l'homme il ne doit manquer à son   
 deuoir. A quoy intentif Scipiō fameux   
 & renommé capitaine disoit, l'hom-   
 me addonné à la vertu n'estre iamais   
 moins seul que quand il est seul, ny   
 moins oysif, que quand il est oysif : par   
 ce qu'à l'homme de vertu, & la solitu-   
 de & l'oisuētē luy donnent tousiours   
 matiere de biē employer ceste partie de   
 la vie, laquelle aux autres produit oc-   
 casio de mal. Ces choses singulieremēt   
 à par moy cōsiderees, Messieurs, m'ot   
 induit à tousiours produire & mettre   
 en lumiere quelque chose qui peut prof-   
 fiter à vostre tresnoble & tresancien-

ne republique. Et ayant conçu tel des-  
seing, aduint (si comme il plait à Dieu  
ordonner de toutes choses) que m'estât  
trouué pour le deuoir de ma charge vi-  
siter vn malade atteint par cas for-  
tuit de la peste, il me fut commandé  
par messieurs vos deputez de la santé  
me tenir par aucuns iours retiré, sui-  
uant en ce fait l'ordonnance publique.  
Pour à quoy obeir demeurât à mō pri-  
ué, & entre les meilleurs & plus ay-  
mables de mes amys, mes doulces mu-  
ses, pour ne perdre ce tēps, & l'ēployer  
en quelque chose fructueuse, prins cō-  
seilde mes Maistres muet & sans  
lāgue, ce neantmoins les plus sages lā-  
gaugeurs, & les mieux disantz qui  
se puisse trouuer (ie dis mes liures) qui  
me persuaderent, puis que par peste ie  
m'estois à eux retiré comme à vn port  
salu

salucaire, que ie fisse entendre à tous la nature & malignité de la pesté, escriuant de toute sa nature, causes, signes & accidentz, & la maniere comment elle pourra par bon aduis & conseil estre deschassée & aneantie par art & sollicitude humaine, qu'elle n'endommage noz Contrees, n'assaille noz vaisseaux, c'est à dire noz corps, ne rompe le sentier de nostre vie. Et soudain esmeu d'un zele de vous faire chose agreable, & proffiter non à vous seulz, ains par vous à toute nostre Gaule, ay mis en auant ce petit traicté qui vous pourra seruir de guide & bon pilote contre la tempeste & iniure du temps pestilenticieux & insect ou nous sommes, puis qu'il à plu à Dieu nous visiter de sa verge, & pour le demerite de noz fautes nous

envoyer ce fleau. Vous trouuerez en ce  
 petit traicté ( petit di-ie en volume,  
 mais non petit en qualite) la nature de  
 la peste & de sa malignité, les causes  
 d'ycelle, les signes tant demonstratifs  
 que pronostiques, pour cognoistre quād  
 elle doit regner, & si en l'air y a in-  
 fection: le moyen de se preseruer en tel  
 temps pour n'en courir tel danger: l'or-  
 dre, police, & reiglement qu'en temps  
 pestilenticieux doibuent tenir les villes  
 & leurs deputez pour bien pouruoir  
 au saiet de la peste: la construction de  
 l'hospital, situatiō & parties d'iceluy:  
 la façō de guerir les malades frappez  
 de tel venin, tant en leur viure, pre-  
 paration de leurs lietz, chambres, &  
 habitations, comme par medicamentz  
 appropriéz tāt à la fiebure qu'aux bu-  
 bons & charbons pestilētieux: le tout  
 par



par bon ordre & methode, ou i'ay employé les singuliers & plus expérimentés remedes que ie me suis peu aduiser auoir autressoyz experimenté, & en partie aussi extraictz des plus souverains & excellentz medecins. Le tout mis en lumiere à l'honneur de Dieu, & soubz vostre nom, & de vostre tresdigne maison cōsulaire, communiqué à homes amateurs de sçauoir & de vertu, pour par ce moyen faire reluire l'honneur de vostre cité & de vostre maison commune, qui est l'appuy des pources affligez, ausquelz vous messieurs, pour vostre charitable amour envers Dieu & voz citoyens, pourroyez non moins diligemment que prudemment. Et pour ne manquer de mon debvoir en ceste mienne charge publicque, estāt retiré en solitude à part moy

de peu de iours, vous ay biẽ voulu pre-  
senter ce petit don, lequel vous plaira  
prendre en si bõne part comme de bon  
cœur ie le vous offre. Suppliant le sou-  
uerain conseruator de l'univers con-  
seruer en vous toutes ses graces: icelles  
augmẽter & promouoir à sa louãge,  
& esleuer a vostre honneur, prouffit  
& vilié de vostre Republicque.

INDI





# INDICE DES CHAPITRES DV present traicté.

\* \*

**D**E la nature & essence de la peste, chapitre 1

Des causes de la peste, chap. 2

Des signes de peste tant à aduenir que presente, & des bōs & mauuais signes es malades pestiferés, cha. 3

Reiglement & regime pour preseruer les sains de ne prendre la peste, chap. 4

Les remedes interieurement pris preseruatifz contre la peste, cha. 5

Regime par medicamens preseruatifz de peste par potions, pillules, poudres, oppiates, tablettes appropriées à preseruer les corps de contagion

tagion & venin, chap. 6

Brief recueil & regime de viure  
pour preseruer les sains en temps de  
peste, chap. 7

L'ordre & police qu'on doibt te-  
nir en vne ville en tēps de peste, & en  
quoy doibuent estre ententifz Mes-  
sieurs les consulz & deputes de la  
santé pour la conseruation de leurs  
Citoyens, chap. 8.

De la cōstruction de l'hospital pour  
la peste, chap. 9

De la façon de traiter & penser les  
malades pestiferés, tant en leur vie,  
chambre, liēt, & remedes conuen-  
ables aux bubons & charbons pesti-  
lentieux, chap. 10

Regime de vie pour le malade  
frappé de peste, chap. 11

Regime de la seigneurie, des potions, &  
euacuations necessaires pour le ma-  
lade pestiferé, chap. 12

Comment l'on doibt proceder à la

cure du bubon pestilentièl, cha. 13.

De la cure du charbon pestilentièl,  
chap. 14

De pouruoir aux accidés plus vr-  
gens qui suruiennent à la fiebure pe-  
stilentièlle, boce & charbon, cha. 15

De l'ordre & regime que doibuët  
observer ceux qui assistent aux ma-  
lades de peste pour les seruir,  
chap. 16

La maniere de nettoier les maisõs  
& lieux infectz, les vestemens de lai-  
ne & toile, les meubles des maisons  
infectes, & combien de temps peu-  
uent demeurer infectz, s'ilz ne sont  
bien nettoies, esuentés & purgés,  
& dás quel temps ce faisant l'on les  
peult rendre hors d'infection,

chap. 17

Reigle generale à observer à tous  
pour se contregarder de n'encou-  
rir la peste en temps suspect,

chap. 18



# DE LA NATURE ET ESSENCE

DE LA PESTE,

## CHAPITRE I.



LE divin Philosophe Platon en plusieurs de ses dialogues nous montrant la voye, & sentier pour droictement traicter d'une chose, & en icelle y proceder scientifi- quement par art & methode, à dict, tout homme addonné à l'intelligéce de quelque chose pour à autruy la faire entendre, deuoit commencer par la diffinitio d'icelle, sans laquelle bien entendue rien ne peut estre dignement expliqué. Ce que Ciceron en ses offices & Galien en son premier liure des differéces des ma-

*n Hippia-  
minore, et  
Alcibiade  
rimo. &  
a Protá-  
gora & So-  
lista.*

ladies ont tressoigneusement obser-  
ué. Or donc puis qu'en ce mien trai-  
cte i'ay proposé (moyennât la grace  
de Dieu) vous declarer la nature de  
la peste, malignité d'icelle & ses acci-  
dentz, pour à si grieue maladie & à  
ses mauuais effectz obuier par les  
moyens que Dieu misericordieux  
nous a laissés par l'art de medecine,  
il sera decent & necessaire comen-  
cer par la diffinition de peste, pour  
entendre que c'est. Mais au parauât  
que venir à ce but, i'inuoqueray de  
cœur treshumble la diuine bonté  
vouloir assister à ce mien œuvre,  
pour iceluy dresser & conduire en  
toute verité & perfection, à la gloi-  
re & hôneur, exaltatiō de son nom,  
vtilité de nos prochains, pour les-  
quelz ayder ie metz ce petit dis-  
cours en lumiere: afin que des moy-  
ens que Dieu nous a donnés pour  
nous deffendre des perils eminents,

*Argumēt  
du presēt  
traicté.*

*Inuocatiō.*

nous en puissions seruir. Luy rendant graces des souuerains benefices qu'il fait iournellement par ses merueilles à ses creatures: nous mortifiant par nos demerites, & nous uiuisant par sa clemence & bonté: nous ayant essargi des tresors de sa sainte sapience, l'art de la medecine, avec les diuins remedes en icelles contenus, pour deliurer sa creature de tous maux, pour le seruir en pureté de vie, sincerité de conscience, & saintes operations. A luy donc Roy des siecles, inuisible, immortel, seul seauant, Dieu plein de bonté & misericorde, tout honneur & gloire soit dōnée es siecles des siecles. amē.

P E S T E donc, selon Galien, c'est Epidemie pernicieuse, qui vault autāt à dire comme maladie populaire, rauiissant tout homme par le plus souuent à mort, sans aucun respect ou exception d'age, sexe, complexion.

*Diffinition de la peste.*



regime de vie, ou condition particuliere quelle quelle soit. Et partant à bonne raison est ditte pernicieuse, comme rien ne peut estre dit plus pernicious, que ce que par sa malignité, & violence cōduit à mort: ce que la peste par sa propre nature, propriētē & contrariētē qu'elle ha à nos corps, fait non moins violement que promptement. Et pour plus exactement entendre que c'est que peste, il faut noter que nous auons plusieurs differences de maladies, assauoir Epidimie, Endimie, peste, & maladie priuée: comme par Galien en plusieurs lieux est tesmoigné. Epidimie est maladie commune & populaire, aduenant en quelque region ou contree & en certain temps: causée par certaine indisposition de l'air ou eaux d'icelle region, produisant en tous vne mesme espece de maladie, comme ou fiebres

*Epidimie*

rausoniques, que le vulgaire appelle le mal chauld, ou fiebre tierces, ou ophthalmies, ou charbôs, ou colicques, ou toux populaires, avec grande difficulté d'alaine ( que le commun peuple nomme la cocoluche) les dysenteries populaires, qui regnēt biē souuent en quelque contrée sur la fin de l'esté, sont de ce nombre. Toutes ces maladies quand elles sont communes en quelque lieu particulier ou region; sont dites Epidimies: qui vault autāt à dire, cōme suruenantes publiquemēt & populairement à icelle region ou contrée, par certaine mauuaise qualité de l'air y estant, & produisant telles infirmités aux corps humains. Car selon Hippocrates & Galien, toute maladie procedāte de l'air infect de semence venimeuse, comme de cause productrice, est en son essence Epidimique, populaire & pestilentielle.

le. Voyla que c'est Epidimie. Endimie est maladie commune, mais propre ce heantmoins à vne seule contrée ou région: qui y vault autant à dire cōme maladie regionale ou provinciale. Par-ce qu'il y a certaines regiōs & lieux qui par leur propriété engendrent certaines especes de maladies qui sont peculieres aux habitās d'icelle regiō, par occasion ou de l'air ou des eaux de ce pays là. Cōme en la terre neufue descouuerte par les Portugaloyz & Espaignolz, en l'isle appellee Hispagliole, & autres de l'Inde, y régnēt certaines pu-  
 stules semblables au mal de Naples, desquelles presque tous les habitās en sont frappés, & y remedient par le boys de Guaiac, d'où l'usage est venu à nous. En Sauoye & vallee de Lucerne la pluspart des habitās ont le goytre. A la Pouille & Calabre quasi tous ont la jaunisse. Et telles

*Endimie*

maladies sont dittes Endimiques prouinciales ou regionales: mais nō pourtant pestilentes ou contagieuses. La peste est (comme dit auons) Epidimie pernicieuse, scauoir est maladie cōmune & populaire, contagieuse & mortele. Maladie priuee, est celle qui est particuliere & propre d'vn chacun en particulier: prouenāt par particuliere indispositiō du corps d'iceluy malade, & par mauuaise reigle de viure par luy obseruee: ou bien par quelque excēs fait, ou corruption d'humeurs en son corps, sans estre contagieuse, mais dangereuse ce neantmoins & mortelle peult elle estre. Ce sont les differences des maladies qui seruēt à nostre propos pour declarer la nature de la peste. Laquelle prinse proprement, est maladie populaire & contagieuse, & par le plus souuent mortelle, en laquelle apparoissent

bu

*Maladie priuee.*

*peste.*

bubons par le plus souuent, charbons, ou morbilles, (que le vulgaire appelle Tac) procedât icelle maladie de corruption veneneuse des humeurs & espritz du corps infecté par l'attraction d'air corrompu ou infect par mauuaise vapeur, ayant propriété d'alterer le corps humain & espritz d'iceluy en estrange & dāgereuse qualité, contraire & ennemye mortelle de l'esprit vital, qui est dans le cœur. A raison de quoy elle rait soubdain & en brief de temps la vie des homes attaintz de telle veneneuse cōtagion par le pl<sup>s</sup> souuent. Et pourcee que nous auons dit la peste estre maladie populaire & cōtagieuse, il est necessaire de declarer ces termes de populaire & cōtagieuse. Populaire & epidimique sont vne mesme chose, assauoir maladie commune à tout le peuple, ou à la plus part d'iceluy. Contagiō est

vne mauuaife qualité en vn corps  
 communiquée à autruy par attou-  
 chement, & engendrant meſme diſ-  
 poſitiō & ſemblable en iceluy à qui  
 elle eſt communiquée : ainſi celuy  
 qui en premier lieu eſt rauy de telle  
 qualité, eſt nommé contagieux & in-  
 feſt. Car à bon droiſt ce nous ap-  
 pellons infeſt, quant en ſoy il a diſ-  
 poſitiō maligne, ou veneneuſe & vi-  
 tieuſe, qui peult eſtre par attouche-  
 ment à autruy communiquée, pro-  
 duifant meſmes effetz & dangers en  
 iceluy à qui elle eſt communiquée  
 comme à celuy qui la cōmunique.  
 Et eſt ditte maladie de peſte com-  
 munemēt engēdrec de certaine infe-  
 ſtiō d'air altéré de vapeur venimeu-  
 ſe, meſlee & ſemee en iceluy, & par  
 l'attraction de telle vapeur en nos  
 corps eſt produitte icelle contagi-  
 euſe & dangereuſe maladie. Laquel-  
 le Dieu tout puiſſant pour punition  
 de

*Genera-  
 tion de la  
 eſte.*

de noz pechez, comme vſant de ſa  
verge & rigueur de iuſtice pour a-  
mander noz fautes, enuoye ça bas:  
comme il eſt eſcrit au Leuitique  
chapitre 26: & au Deuteronomie  
chapitre 28, Si vous n'obſeruez  
mes commandement (dit le Sei-  
gneur) ie vous extermineray par  
peſte, qui vous conſommerà. Ce *An lib.*  
qu'aussi entre noz Medécins. Cel- *chap. 1*  
ſus à doctement monſtré, diſant les  
eſtranges maladies venir aux hom-  
mes par l'ire & corroux des ditux:  
& pour en obtenir guérifon, eſtre  
néceſſaire accourir à leur ayde. Cō-  
me auſſi Homere, ſource des bons  
eſprits, à dignemet exprimé au pre-  
mier liure de ſon Iliade. Comme  
ainſi donques il ſoit euident par les  
teſmoingz que deſſus, la peſte eſtre  
vn ſigne manifeſte de l'ire de Dieu  
à l'encontre de nous, le premier &  
plus ſalutaire remede c'eſt ſe retirer  
b 4 à luy,

à luy, comme pere de misericorde,  
 & souuerain medecin pour impe-  
 trer sa grace par ieusnes, prieres,  
 oraisons, aulmosnes, bonnes ope-  
 rations & amandement de vie, pour  
 appaiser & addoucir son ire, nous  
 reconcilier à luy, & acquerir sa gra-  
 ce & misericorde: comme firent ia-  
 dis & par tels moyens les Niniui-  
 tes, & fait de mesme Dauid apres  
 l'offence faicte à Dieu. A l'imita-  
 tion desquels si nous recourons à  
 sa bonté, il n'est à doubter qu'il ne  
 nous regarde de son œil de pitié &  
 misericorde pour donner salut à  
 l'ame, & santé aux corps, selon la  
 promesse par luy faite à ceulx qui  
 le reclameront en humilité, en  
 sincerité de bouche, pureté de  
 cœur & de conscience. Voila le  
 premier reiglement.



DES CAUSES  
DE LA PESTE,

## CHAP. II.

**L**es maladies contagieuses & pestiléntielles, côme toutes autres especes de maladies, ont leurs causes.

Car rien ne peut estre produit sans la cause efficiente & generatiue de l'effect. Or donc la peste hà ses causes productiues, desquelles elle prend son origine & source, & est engendree par vn certain moyen plus secret & occult que les autres maladies. Car le plus souuent les causes des maladies priuees & sans contagion, sont, trop grande repletion, cacochymie, obstruction, cõstipation, pourriture: comme par Galien à esté en son liure des Cau-

ses des maladies tresdoctement deduit. Mais la peste n'a nulle de ces causes cy mentionnees en auât que contagieuse & pestilente: ores qu'auéc les causes de repletion, cacochymie, obstruction & pourriture, la peste puisse estre compliquee & conioincte: mais non que ce soyent ses propres causes qui l'engendret: car autrement faudroit confesser toutes maladies estre pestilentes & contagieuses, si la repletion, pourriture, obstruction & stipation estoit propre cause de maladies populaires & Epidimiques. Ce qu'estre ne peut. Il faut donc trouuer la propre & continente cause de la peste & semblables maladies contagieuses. Nous dirons avec nostre Galien és liures de Theriaca ad Pisonem & Pamphilianum, que toutes maladies pestilentiellles sont engédrees, comme de leur propre cause, d'un

air maculé & alteré en sa substance, par vn certain & vitieux meſlange de vapeurs corrompues & eſtrâges, contraires à la vie de l'homme, & corruptiues de l'eſprit vital: laquelle maladie excretiô ſemee en l'air, & iceluy infectant, communiquée à nous par la continuelle attraction de l'air que nous faisons, pour ſeruir à la reſpiration, nous empoisonne cômme venin. Le changemēt (dit Galien) prompt & ſoudain qui eſt fait en l'air par mauuaife corruption d'iceluy, produit la peste, laquelle comme vne beſte rauiffante, depopule & degaſte par mort pluſieurs hommes, voire les Cités, parce que les hommes, ayants neceſſité de reſpirer, tirēt par la bouche l'air infect cômme venin. Voyla la propre & immediate cauſe generatiue de la peste; l'attraction de l'air infect & contaminé de certaine vapeur

peur enuenimee & du tout contrai-  
re à l'homme. Ce qu'au parauant  
Hippocrates le grand maistre de la  
Medecine, auoit dit au liure De la  
, nature humaine, La cause, dit-il, de  
, de la maladie populaire & pestilen-  
, te, qui indifferement attaque tou-  
, tes personnes, c'est l'air que nous  
, attirons ayant en soy vne semence  
, maladiue & venimeuse, laquelle  
, nous attirōs par l'inspiratiō. Or les  
causes qui engēdrēt telle vapeur en  
l'air, sont plusieurs & diuerses: car  
aucunesfoys telle vapeur est euee  
en l'air par la corruption des corps  
mors & non seueliz. Cōme es lieux  
ou se fait quelque bataille l'on voit  
souuēt aduenir: & est par plusieurs  
hystoires mētionné. Aussi par mau-  
uaises vapeurs sortantes de la terre  
& certaines cauernes d'icelle, qui  
font exhalations de vapeur cor-  
rompue & cōtaminee en l'air, d'oū  
est

est engendree celle macule en iceluy, si comme par mauuaise qualité de certaines eaux palustres, pleines de boue ou fange pourrie & diuerses sortes de plantes & animaux veneneux, & de mauuaise qualité peut estre produit tel vice en l'air. Mais nos anciens medecins & Astrologues, comme Auicenne, avec plusieurs autres, ont dit, la peste auoir deux origines & sources, d'où, comme d'une fontaine, elle prend son origine. La premiere source, est l'indisposition de la terre par trop humectee, & remplie de grosse & mauuaise vapeur: laquelle estant par la vertu du soleil esleuee en l'air, & meslee avec iceluy, corrompt la nature & complexion, & engendre certaine disposition en luy contraire à nostre substance, d'où aduient que ceux qui attirent tel air ainsi contaminé, sont en danger de s'infecter

fecter, & receuoir maladie pestilente & contagieuse. Et principalement s'ilz sont mal habitués, repletz de mauuaises humeurs, hommes desreiglés, sanguins, & ayants les pores larges, comme aussi gens debiles & delicats sont plus prompts à receuoir telle contagion. L'autre source de la peste, (dit Auicenne) procede des formes celestes, assauoir des Astres & leurs configurations & aspectz malings, qui causent par leur influence telles maladies contagieuses & pestilentes: comme aussi tesmoignent sur ce tous les Astrologues. Mais en verité quand à mon opinion fondee sur la diuine determination de Platon en son Epinomide & en Timeus: de Plotin souverain Platonicien, de Iamblichus, Proclus, Mercurius Trismegistus, d'Aristote, & Auerrois, ie trouue ceste opinion faulce & erronee, de pe-  
ser

ser que contagion aucune ou infortune, incommodité, maladie, & dommage puisse par les Astres venir aux hommes, d'autant que (comme dit Platon) en son dialogue intitulé Epinomis, La nature des Astres est tresbelle à voir, ordonnée en ses mouuemens, & bienfaisant à tous les animaux, leur élargissant toutes commodités de generation & conseruation. Doncques si la nature des Astres est si bonne, qu'elle merite estre appelée diuine, (comme en ce mesme lieu dit Platon) & porte tant de benefices aux corps inferieurs, cōme peut-il estre que les Astres portent infection & contagion en ce bas manoir terrien? comme soit que nulle cause peut produire effectz cōtraires par soy-mesmes. Si donc le bien des corps inferieurs procede des corps celestes; auoir la generation, produit

duction de fruitz, maturation d'iceux, & conseruation de la vertu d'un chacun, comme en verité il procede, il ne sera possible que la corruption & extermination des corps procede des Astres. Et par ce  
,, à bonne raison disoit Aristote, Ce  
,, monde inferieur estre necessaire  
,, estre ioinct & cōtigu au superieur:  
,, à fin que toute sa vertu fust condui  
,, te & gouvernee par iceluy. Si  
donc les Astres par leur vertu conseruent les creatures de l'uniuers, comme les pourront-ils par corruption, venin, contagion dissiper & corrompre? Et le mesme autheur Platon, appelle tous les Astres & estoilles seurs, pour leur accord à bien faire, & dit estre grande meschanceté aux hommes, penser que les aucuns des Astres soyent mauvais & malings, & les autres bons, veu qu'ils sont tous bons. Car com



medit Cahlcidius ſouuerain Platonien, en ſes commentaires ſur le Timée de Platon, Du ciel rien de mal ne peut naiſtre ny proceder: eſtant en ce ſainct lieu toutes choſes bonnes, & reſentans de la diuinité, ou rien de malice ne peut conſiſter, & ne peuvent (comme il dit) les Aſtres changer leur nature; d'autant qu'elle eſt ſimple & pure, & ne peuuent degener de celle ſimplicité & pureté, laquelle par le pouuoir diuin leur a eſté ottroyee. Pourquoi donc leur attribuerons-nous vertu maligne, peſtilente, contagieuſe, rauiſſant les animaux par influence venimeuſe & peſtilente? Car ſi contagion eſt la pire choſe qui puiſſe eſtre, (comme en vérité elle eſt) la plus deſordonnee, la plus contre nature, & la pluſtoſt diſſipant la vie: de laquelle contagion la ſource & origine n'eſt que vice, infirmité, pourriture, & corruption en la

matiere: comme voulons nous attribuer aux Astres & au Ciel principe de toute generation, tel enorme, accident estans les Astres corps celestes, bien ordonnés, trespuissans, sans vice, sans corruption, & sans matiere subiecte ou propice à contagion. Et par-ce disoit trespaignement Averrois souverain commentateur d'Aristote, que, Quiconques croit Mars ou autre Planete disposé en quelle facon que ce soit, nuire aux corps inferieurs, que tel croit en verité choses estranges de toute la Philosophie. Et icelluy mesme auteur sur le neufuiesme de la Metaphysique d'Aristote dit, les corps celestes qui sont principes de toutes choses, estre eternels, & en iceux n'y auoir aucun mal, ny erreur, ny corruption: car corruption est de l'ordre des choses mauuaises. Et de ce (dit-il) se cognoist estre impossible scauoir ce que les

Astre

Astronomes disent, y auoir quel-  
ques estoiles fortunes, les autres in-  
fortunes : ains ce tant seulement se  
peult scauoir, les vnes estre meillures  
que les autres, estans toutes bones.

Voila la belle & vraye sentence de ce souverain Philosophe, ce qu'auparavant, quand à la première partie de ceste sentence, auoit doctement dit Aristote. au 9. liure de sa Metaphysique chap. 10. Le sage Mercure Trismegiste disoit en son dialogue intitulé Asclepius; que tout ce qui descend du ciel est generatif. Si donc l'influence du ciel vers nous est generative (comme en verité elle est disant Aristote que le Soleil & l'homme engendrent l'homme) il n'est certes possible qu'elle puisse corrompre & meurtrir par contagion. Ce qu'aussi Proclus, interprete de Platon au liure de l'ame & du Demon, a confirmé: Les corps celestes

,, (dit-il) par vne harmonie souueraine  
 ,, contiennent en soy toutes choses, les  
 ,, rendent parfaites, & les accommo-  
 ,, dent entre soy-mesmes & à l'vniuers.

Si donc il est ainsi que les corps celestes rendēt parfaites toutes choses, & les accommodent & conseruent (comme en verité ilz font, & ce tesmoigne cest aucteur) comme nous pourront-ils engendrer contagion & infection, qui abolit nostre perfection & integrité, & nous endommage par rauissement de la vie? C'est chose impossible à dire la verité. Car cela repugne à la nature de la contagion, qu'elle descende du ciel: d'autāt que contagion n'est autre chose que

*Cōtagion.* infection procedāte d'vn à autre par communication de vapeur pestilente & infecte: & par ainsi si des astres procedoit la peste & contagion, il faudroit par la diffinition de contagion, que les astres fussent premiere-

ment

ment infectz, s'ilz nous doiuent par leur influence enuoyer contagion pernicieuse. Ce qu'estre ne peut en façon que ce soit. D'autant que les astres pour estre corps celestes, purs, diuins, & esloignez de toute corruption, ne receuans aucune infection en eulx, n'estans corps materiels, idoinés à transmutation ou changement, comme bien disent Aristote & Auerroys és liures du ciel & du monde. Les astres en verité n'estans capables d'infection ou contagion, ne la pourrôt communiquer ça bas. Laissons donc ceste vaine & folle opinion de croire la peste venir du ciel, assauoir de l'influence des astres: comme en nos lieux communs, chapitre second de l'appendice, j'ay par long discours & bonnes raisons prouué. Bien est-il vray qu'elle prouient par le secret iugement de Dieu, voulant punir par tel fleau nos fautes: comme

au Leuitique & Deuteronomie est  
 escrit. Et pour conclusion dirons, la  
 cause de la peste estre la maligne al-  
 teration & corruption de l'air infe-  
 ctant nos corps, comme dit à esté au  
 commencement de ce Chapitre.

**D E S   S I G N E S   D E   P E -**  
*ste tant à aduenir que presente, &*  
*des bons & mauuais signes és ma-*  
*lades pestiferés, CHA. III.*

**L**Es signes par lesquels l'on  
 pourra cognoistre l'infe-  
 ction de l'air, nous menas-  
 sant de maladies pestilentielle, sont  
 quant l'on voit l'air continuellement  
 & par long temps trouble, gros, ne-  
 buleux, humide, de mauuaise odeur,  
 & sans vents, mesmes septentrio-  
 naulx, ains estant l'air marineux, &  
 plein de nues, nebles, & vapeurs, fai-  
 sant semblât de plouuoir, sans pluye  
 suy

ſuyuâte: car tel ſigne engédre fiebures  
de corruption: comme dit Ariſtote:  
en ſes problemes. Si l'hyuer eſt chaud.  
& humide, ne gardant ſa naturelle  
temperature, & quand le prin-temps  
eſt fort eſſuyt ſans pluye, & ce neant-  
moins froit, & en apres regne le vent  
marin par pluſieurs iours, avec air  
trouble, & puis s'eſclarcit, & puis ſe  
tourne troubler, les nuiéts froides, &  
le iour fort chaud & engoyſſeux, ce-  
la ſignifie peſte maligne à aduenir en  
eſté: meſmes ſi en ce temps ſe mon-  
ſtrent pluſieurs animaux engendrés  
de putrefaction, comme vers de terre  
moyſailles, mouches, eſcharbots, an-  
guilles, ſerpens, crapaux, grenouilles,  
& ſemblables, denotans corruption  
& putrefaction en la terre & eaux, &  
quand l'air ſe change en vn meſme  
iour de trouble en clair, & de clair en  
trouble: le ſoleil reluyre & puis ſe ca-  
cher ſouuēt en vn meſme iour, cela de

note la temperatui e de l'air estre alteree. Et quand les rats, taulpes, & autres animaux viuants sous terre sortēt hors leurs cauernes, c'est signe de corruption en icelle, par la fuyte de ces animaux de leurs lieux naturels. Et quand les oyseaux en l'air tombent morts, ou delaissent leur nids, c'est signe de grand corruption & contagion en icelluy: Les pluyes longues & continuelles avec vents marins disposent l'air à maladies de putrefaction: comme Hippocrates & Galiē resmoignent en leurs Epidemies. Quād l'on voit es fiebures apparoir morbilles, taches, ou rougeurs semblables à piqueurs de puce, c'est signe de fiebure pestilentielle. Quand le malade est fort angustié, avec mal de cœur, vomissement, syncôpe, ou debilité de cœur, sans grande chaleur exterieure, & grande ardeur interieure, & soif inextinguible, avec appa-

rence



rence de bubon, boce, charbon, & morbilles, ne fault doubter que telle fiebre ne soit pestilentielle, mesme si plusieurs sont attaquez de mesme mal en mesme lieu, & si l'on a frequente personnes infectes & contagieuses. Voyla les principaux signes de peste & fiebre pestilente. Les signes mauuais, dangereux, & mortels es patiens sont, foyblesse de la vertu regitiue du corps, (ce que par le poulx se cognoist quant il est debile, inegal, desordonné, defaillant, & entrecouppé) syncope frequente, alienation & frenesie, liuidité & noiffure, apparente es bubons & charbons, & apres l'apparence d'iceux soudain euanouissement. Froideur des extremités avec chaleur intolérable interieurement, soif inextinguible, vomissement continuel, vrines blanches & crues, ou rougeastres, troubles & noyres: Sueur froide au

c s front

front & vifage, fpaſme, excremens noirs, puants, liuides, flux de ventre avec foybleſſe de cœur: difficulté d'aleine & grand puanteur d'icelle, ne pouuoir dormir, ny māger: profond ſoinmeil, changement de couleur au vifage, en palleur, noirſeur, ou liuidité, agitation & grande inquietude. Tous ces ſignes denotent ou mort certaine, ou danger d'icelle en peſte. comme les contraires denotent la ſanté du malade: comme forte vertu regitiue du corps, bōne complexion & bon cœur. Car (comme dit Auicenne) ceux qui ſont viriles & ſouſtiennent virilement la maladie, & ſans eſfray, ſont ceux qui par le plus ſouuēt eſchappent. auoir bon appetit, dormir en repos ſans grande inquietude. Les bubons & charbons de bon ne couleur, & ſans grande douleur, bien toſt reduits à ſuppuration, chaleur moderee en tout le corps, vrines

dige

*Peu. 1. 41.  
cap. de fe-  
bre peſte-  
lente.*

digestes en couleur, substance & cōteus, bonne respiration, sueur chaulde & esgalle par tout le corps, venāt en iour cretique. Tous ces signes apparens donnent bon espoir du malade. Ce sont les signes & indices par lesquels tu pourras faire bon & seur iugement de ce qui est à aduenir à ton malade.

**REIGLEMENT ET REGIME pour preseruer les sains de ne prendre la peste, CHA. IIII.**

**L**Ors que par le vouloir de Dieu la contagion de peste est introduite en vn lieu, cité ou contree, l'on doibt soigneusement auoir esgard à la santé publique, pour preseruer ceux qui sont sains de ne tomber en tel incōueniēt. Donc en premier lieu l'on se doibt garder de frequenter lieux & personnes

nes infects pour ne receuoir l'haleine d'iceux. ce que par Galien est doctement escript liure premier des differences des fiebres, Chap. 2. & s'esloingner d'eux tant qu'il est possible: & par ce le premier & souuerain remede de c'est au plustost changer de lieu, foudr loing, & tardt etourner. Et aussi Hippocrates à dit au liure de la nature humaine, qu'il fault changer le lieu ou la maladie populaire regne. ce que le vulgaire dit cōmunement, *estò, longè, tardè.* & si la necessité contraint frequenter les infects, pour secourir les siens ou autrement, il faut se tenir en part que leur haleine ne puisse par uenir aux sains. Ce que se fera si l'on scaura choisir le vent à propos qui tire vers les malades ou infects, & non des infects aux sains: & par ce en tel cas fault que les sains se mettent sur vent & non dessoubs. La premiere partie de preservation est de purifier

rifier & purger l'air de toute mauuaise vapeur, senteur, puantise, corruption, putrefaction & mauuaise qualité. Parquoy est necessaire faire bon feu aux maisons, de boys odoriferants, comme de sermens de vigne, de Romarin, de Genieure, de Laurier, de Chainé, & parfumer toute la maison de la fumée du romarin, du genieure, d'escorces de pommes, d'estorac, benioin, encens, roses seiches, lauande, & semblables: & ce soir & matin. Et par les coings des rues, vne ou deux fois la semaine, allumer des gros feux flamboyants pour consumer la maligne vapeur de l'air. Ce que en la grande pestilence de Grece Acron souuerain Medecin commanda faire, comme tesmoigne Paulus Aegyneta lib. 2. Chap. 35. Aussi est bon odorer continuellement bonnes senteurs, comme est en temps d'hiuer maioraine, romarin, estoracs, benioin, ou en  
faire

faire vne pomme comme s'ensuyt. & la porter avec soy pour l'odorier souvent. Prenés fleurs de roses rouges, de violettes, de buglosse, de chacun demy poignée, des trois sandaulx, de chacun vne dragme, racine d'angelique, de gentiane, & de zedoaire, de chacun quatre scrupules: encēs blāc, girofle, noix muscade, calami aromatic, de chacun vne dragme: storac calamite, & du rouge, benioin, de chacun vne dragme & demye, musc oriental vn scrupule, ambre gris demy scrupulle, Ladan infusé en eau rose vne once: mesles le tout en eau rose de infusion de gomme dragant, & vng peu de vinaigre rosat: soit faict paste, de laquelle soyent formees pōmes rondes pour porter au col & sentir continuellement. Ou prenés de l'eau rose deux onces: de vinaigre rosat blanc vne once, au nasse deux onces, vin blanc ou maluasie bonne

deux

deux culliers, pouldre de girofle & de racine d'angelique & estorac, de chacun demye dragme: mellés tout ensemble, & de ceste liqueur vous vous froterés les mains, le nez, le frôt, visaige & poulx des bras: car telle odeur repousse fort le venin & air pestilérieux. Côme aussi tenir en la bouche racine d'Angelique, de Gentiane, de zedoaire, ou l'escorce d'orange ou limô, qui à cest effect sont fort souverains: côme tesmoigne Auicenne. Ceste cōtinuatiō de bōnes odeurs conforte le cœur & esprit vital, rechasse toute vapeur venimeuse, & rectifie l'air à nous proche. comme tesmoigne Auicenne au liure des forces du cœur. Parquoy ceux qui se veulent maintenir sains, n'en doivent iamais estre depourueux. Entre les medicaments ayans propriété de conforter le cœur & reliour, c'est le Yaccinthe oriental porté sur la  
por

poitrine, attouchant nuement la chair, ou bien tenu en la bouche: ce qu'est par Auicenne escript au liure des forces du cœur, Chapitre propre du yaccinct, disant, icelle pierre non seulement auoir proprieté de corroborer le cœur & resiouyr l'esprit vital: ains de repugner à tous venins. Parquoy conseille à ceux qui aurôt moyen d'en auoir, la tenir ou porter continuellement en la bouche ou au col pendue, attouchant la region du cœur, pour l'excellente proprieté que les auteurs luy attribuent tous d'un accord.

*LES REMEDES PRESERUATIFZ contre la peste par medicamentz interieurement prins.*

### CHAPITRE V.



Alien au liure premier des differences des fiebures, au chapitre de la fiebure pestilē



tiale, dit, pour preseruer les corps de telle corruption, estre necessaire les rendre purs & netz de superfluitiez par purgations commodés, & oster les oppilations qui gardēt que la chaleur naturelle ne se peult librement euentē, deseicher les corps humides, & maintenir les secs en leur estat. Suyuant laquelle opinion, est merueilleusement dūysant euacuer la superfluité des humeurs abondantz selon la nature d'iceulx, selon l'age, la complexion, la vertu, quantité, & qualité des humeurs qu'il faut euacuer. Et est biē à noter qu'e temps suspect nulle euacuation accoustumee ou par flux de hemorrhoides, ou de ventre, vlcères vieilles, sang mēstrual, rognēs & semblables ne doibuent estre restraints, Car telles purgatiōs nettoient la superfluité des humeurs, & par ce moyen rendent les corps sains, & yceulx hu-  
d meurs

meurs retirés ou par medicamentz astringétz, ou oignemēs parcilz, pouroyent grandement nuire aux membres principaulx, & causer maladies estranges en iceulx. Et par telle raison Hippocrates & Galien, disoyēt estre bon signe quant du profond du corps & principales parties aucune defluxion se transinue au cuyr: & au contraire icelle transportee du dehors au dedans, estre mauuais signe. Parquoy en temps de peste est plus seur laisser fluer telles superfluitez, que les arrester ou guerir d'autant que par icelles le corps se purge des superfluitez qui pouroyent nuire estāt retenues. Ce qui seruira d'aduertissement à tous qui seront en telle disposition en temps suspect. Dóc les sanguins, repletz, & ieunes doiuent estre saignés cōpetément pour diminuer la repletion & abondance du sang. Ceulx en qui la colere abon  
de

de doyuent estre purgez avec infusion de Rheubarbe, s'il est riche: & s'il est pouure, avec Electuaire de suc de roses, en donnant trois dragmes ou demie once avec eau d'aygrete, dendiue, de porcelleine, le Catholicon, le Diaprunis laxatif, le sirop rosat, la Calsie à cest effect sont propres: comme aussi les pillules de Rheubarbaro, les aurees, & de fumo terre. Les Phlegmatiques seront purgez avec agaric, diasenicon, diacarthami, pillules aggregatiues, cochees, de agarico, selon la vertu du corps, & quantité de l'humeur peccante au iugement du scauant medecin, par qui telz medecamentz doiuent estre ordónez, & non par ignorantz, idiotz, ou mal versez Empiriques. Les Melancholiques seront purgez avec infusion de sené & epithymi, avec yn peu d'anis, avec catholicon. Confection, Hamec, Dia-

d 2 sené

fené solutif, Pillules de fumoterre, aurees. Je laisse les pillules de lapide armenio & de lapidé lazuli, pour estre trop violentes & moins bien preparees. Les debiles delicatz, femmes enceintes, enfans, & vieilles gens, suffira purger avec vne once de Casse extraicte, demye, ou vne dragme de Rhubarbe, ou deux onces de bonne manne, ou troys onces de sirop rosat, ou bien de sirop de Cichoréa avec de Rhubarbe, le tout selon le iugement du medecin a ce deputé, & non à la fantasie des ignorantz à qui ce n'appartient.

Aux petits enfans subietz aux vers, bailleras ceste pouldre en temps de peste appropriée tant à l'un qu'à l'autre, laquelle destremperas en eau de porcellaine, d'aygrette, & de grame avec vne once de sirop de limons. La pouldre est telle:

Prenez graine barbotine, semence d'

Citron ou de poncyre, qui est beaucoup meilleur, semence d'aigrette & de porcelleine de chacun demie dragme : de l'herbe appelée scordeon du vray, vn scrupulle, rhubarbe puluerisée, vne dragme, bol armenic vn scrupulle : soit de tout faict pouldre subtile, de laquelle en donneras demye dragme ou vng scrupulle au petit enfant, comme dit est.

## REGIME PAR MEDI

cament & preseruatif & de peste par potions, pillules, pouldres, opiates, tabletes, appropriées à preseruer le corps de contagion & venin, CHAP. VI.



A diuine prouidence soigneuse de sa creature & conservation d'icelle, ha produit plusieurs remedes pour obuier aux dangers de la peste, & tout au-

tre contagion venimeuse. Lesquelz nos Anciens Medecins ont nommé Antidotes, comme contraires à telles dispositions par la nature & propriété en iceulx enclose. comme par Galien en ses deux liures des Antidotes est doctement declairé. Nous mettrons en ce present Chapitre les remedes plus à tel effect cōuenables, tant pour les riches que pour les pouures gens, desquelz il fault auoir plus grand cure que des autres, pour nous auoir estez singulierement recommandés de Dieu, & d'autant que iceulx n'ont pour leur poureté moyen de se secourir: à quoy par nostre charité deuons accourir singulièrement, comme cy apres sera dict. Et fault changer ces remedes, affin que la nature faysant vsage d'un d'iceulx ne mesprise sa vertu, comme escript Galien au liure v. de la cōseruation de santé. Estant donc en premier lieu

lieu bié purgé le corps, l'on vſera de Pelectuaire theriacal de Guidô, principalement en hiuer ou automne, & enuers ceux qui ſeront de complexions froides & humides, ores qu'e toutes il ſe puiſſe commodement dōner. Les apoticaïres tiennent la pouldre pour icelluy toute preparee, de laquelle l'on en pourra prendre vne dragme entiere deſtrempee en eau de bugloſe ou d'aygrette, ou de bon vin blanc, ou claret en h'iuer: & eſt la ditte pouldre fort bonne à tel eſſect, ſi elle eſt bien & fidellement compoſee, & eſt à bon marché pour les pouures: & de la ditte pouldre l'ō en pourra vſer deux ou troys iours, ou bien en forme de tablettes, ſi l'on l'aime mieux. Auſſi de ceſte pouldre qui ſ'enſuit, laquelle eſt ſinguliere, de laquelle au lieu de la precedente l'on pourra vſer deux ou troys iours enſuyuantz pour changer: Pre-

nez racine de tormentille , racine de gentiane, racine de Zedoaire, & d'angelique , de chacun vne dragme: Cannelle fine , sandal citrin , semence de Citron , semence d'aygrette , de chacun vne dragme & demye , raclure d'yuoire, Chardon beneict , escorce de citron , d'vn chacun quatre scrupulles : boli armenic prepare , deux drachmes , sucre fin tant qu'il suffise: soit fait pouldre subtile, de laquelle s'en peult prendre vne drachme aux gr̃s, ou demye aux ieunes, avec d'eau d'escabieuse , ou aygrette , ou troys culliers de bon vin blanc.

Pour les pouures remede singulier escript par Galien au secod liure des Antidotes, fait & compose par Apollonius. Prenes vingt fueilles de Rue, deux noix communes , deux figues seiches & bien grasses, vn petit de sel, mesles tout ensemble: & en prenès le matin vn morseau, & beuu



beuues vn peu de bon vin blāc apres:  
si en ieun l'on prend de tel remede,  
de ce iour nul venin ne pourra nuy-  
re, comme dit Galien suyuant l'op-  
pinion d'Appollonius au lieu preal-  
legué. Autre remede facile & tres-  
singulier, duquel vsoit le Roy Nico-  
medes pour se preseruér de tout ve-  
nin & poyson. Bayes de genieure  
deux drachmes, terre sigillee deux  
drachmes: soit fait pouldre, & puis  
l'incorporer avec de bon miel, & en  
faire oppiate de laquelle l'on en pren-  
dra vng bolus de deux drachmes  
pour les riches. Et pour les pouures  
au lieu de la terre sigillee, y faudroit  
mettre du bol armenic prepare. Ce  
remede est escript par Galien au lieu  
preallegué, & est de grande efficace.  
l'Electuaire de bolo armenio est cō-  
mun en vſage, & de bon goüſt.  
Les pillules de Ruffus communes,  
contre la peste ſont ſouueraines, qui  
d s se

se font ainsi: Prenez aloës & armoniac de chacun deux drachmes, myrrhe vne drachme, soit fait masse avec bon vin blanc: c'est de la description de Paulus Aegyneta: mais l'on les fait plus appropriées sans l'armoniac, & au lieu d'icelluy, on y met du saffran en la maniere qui sensuyt, & pour c'est effect sont excellentes. Prenez aloës lauë en eau rose vne once: myrrhe, saffrân, de chacun deux drachmes: boli armeni deux drachmes, soyēt faites pillules ou masse avec vin blanc ou ius de limons en esté. De ceste masse l'on en formera cinq pillules pour drachmes & se prendront au matin. Autre remede de preseruatif & bon pour les pourceurs gens. Prenez vne ou deux bonnes poignées d'aygrete, mettez la tremper dans vne fiolle de bon vinaigre blanc rosat, & le tenez couuert, & au matin à vostre leuer prenez

drés troys ou quatre fueilles d'ycelle aygrete ainsi trempee : & est fort bon remede, d'autant que l'aygrete par sa vertu reprime la chaleur du sang, & resiste à toute putrefaction. Et si dudiect vinaigre l'on en boyt vne cullier ou deux au matin, ou l'on arrose vne rostie de pain blanc avec vn peu de sucre, cela est fort bon en tel temps. Les aucuns font ce mesme des fueilles de la rue : mais on n'en doibt vsfer sinon en temps froid, & enuers gens vieulx & flegmatiques, pour la chaleur. La graine du genieure ainsi trempee en vinaigre rosat est merueilleusement appropriée à tel effect, prinse au matin.

**LES**

**LES REMEDES** **SUI-**  
**uantz** sont fort excellens & ap-  
propriés à la peste.

**Pomme de senteur** fort bonne en  
temps de peste.

**P**renez du ladan biē odoriferant  
& benioin, de l'estorac calamité,  
trocisques de gallia muscata, gi-  
rofle, macis, spicenardi, lignum  
aloe, Zedoare, des troys sandaulx,  
racine de iris Florentin, de chacun de  
my once: soit le tout subtilement  
puluerisé, & passé par tamis, puis in-  
corporés le tout avec storac liquide,  
y adioustant du musc & ambre de  
chacun vne drachme, de cyuete deux  
drachmes, & soit faite paste de la-  
quelle l'on formera des pommes rô-  
des avec eau rose d'infusion de gom-  
me dragant.

**MUSCARDINS** POUR  
tenir a la bouche en temps de peste,  
& font bonne halaine.

**P**Renés sucre fin vne once, iris de  
Florence demye once, escorse  
d'œufz la peau du dedans estât ostee  
demye once, ambre gris & musc orié  
tal de chacun vne once, mettés l'es  
corce d'œufz à remollir dans eau ro  
se muscate, par l'espace de huit  
iours: pillés le tout subtilement, &  
avec eau rose d'infusion de gomme  
dragant: faites les muscardins de tel  
le grosseur que voudrés. Et sont mer  
ueilleusement bons, & font l'halaine  
suave, & confortent le cœur inte  
rieurement, & sont bien temperés, as  
sauoir non gueres chaudz: ilz se peu  
uent tenir à toutes heures en la bou  
che.

**DEF**

**DEFENSIF ADMIR-**  
*vable & excellent en forme d'vn-*  
*guent pour defendre le cœur en*  
*tēps de peste tant aux sains qu'aux*  
*malades, il est de tresgrand effect.*

**P**renez de la triacle, de la meilleu-  
re qui se pourra trouuer, ou en  
son lieu du mitridat, mais la triacle  
est beaucoup meilleure, deux onces:  
leius de six lunōs meslés ensemble:&  
faites le bouillir dans vn petit pot en  
uernissé, à petit feu sans fumee, ius-  
ques a ce que la moityé du suc se cō-  
sume, & laissez cela refroydir, &  
puis prenez deux dragmes de bon  
saffran pilé, de carline & diptain  
blanc, de chacun deux dragmes, in-  
corporé le tout ensemble les choses  
susedites bien pillees, & reduytes en  
forme d'unguent, duquel tous les  
iours en oindrés la region du cœur  
soubz la mammelle gauche, faysant

vn cercle dudit oignement à l'entour de la mammelle: Et puis prendrez vne piece d'arsenic crystallin vne once, estant enuoloppé ledit arsenic avec du coton & taffetas rouge, en forme de sachet: puis portés le lié dessus & au droict de la mammelle gauche. Et se peult l'on asseürer que iamaïs l'homme ne s'infectera, vsant toutesfois des remedes interieurs, comme dist est & dirons.

*Presernatif pour la peste fort  
approprié.*

**P**rens del'herbe du gauchet, dite en Latin Calendula, verbene, scabieuse, & aigrette: de chacun vne poignée: gentiane, Zedoare, diptam blanc, de chacun deux drachmes: tormentille, herbe tunci, cacline, de chacun demye poignée: faites boullir le tout en eau claire deux li-  
ures

ures, iusques à la moytié; adiouctey  
ius de limons six onces, sucre fin tât  
qu'il en sera besoing. Soit fait sirop  
aromatisé avec canelle fine. Et pren-  
dras de tel sirop le matin quatre ou  
cinq onces.

**E. A VOIX SINGULIÈRE**  
re tant pour les sains que les mala-  
des de peste pour en user tous les  
matins deux doigts dans vn verre.

**P**rens valeriane, cylina, Zedoai-  
re, myrrhe bonne, boliarmeni,  
gentiane, aristolochie ronde, calami  
aromatic, diptam blanc, impetato-  
ria, de chacun vne once, & de nyct  
aloë fin deux dragmes, saffran vn  
scrupulle. Puluerisé le tout subtille-  
ment, & apres metz le tout trempé  
dans cinq liures d'eau de vie perfe-  
cte, & y demeuretôt en infusion six  
heures, tenant le vase bien fermé, &  
apres



apres les six heures passées, y adiou-  
steras cinq liures de bonne maluo-  
fie, & couleras le tout; ou bien y  
pourras laisser les simples, mais il est  
plus playfant coulé, & de ceste eau  
en prendras tous les matins deux ou  
troys pleines culliers d'argent. C'est  
vn remede de grande experience.

**PILVLES TRESBON-**  
**nes a la peste & sort**  
**aprouuees.**

**P**renez aloës vne once, myrrhe &  
safran de chacun troys drachmes:  
boliarmeni, terre sigillee, Zedoare,  
diptam blanc racine de tormentille,  
de chacun vne drachme. Soyent fai-  
tes pillules avec ius de gauchet, ou  
de choux rouge, desquelles l'on en  
prendra vne tous les iours, & vne  
foys le mois vne drachme.

**R E M E D E   S I N G V -**  
**lier** & fort approuué & experi-  
menté en plusieurs.

**P**Renés racine de tormentille &  
de diptā blanc, racine de valeria-  
na, & de marguerites ; dites en La-  
tin belis : & s'il est possible les trou-  
uer vertes, il seroit beaucoup meil-  
leur. Prenez de sdittes racines autant  
de l'une que de l'autre, pilés les, & fai-  
tes les en pouldre fort subtile : puis  
prenez de la decoction d'aygrete, de  
scabieuse, & du gauchet, & dans la  
ditte decoction mettez tremper la  
ditte pouldre, & laissez la seicher au  
soleil, & puys encores tournés piler  
laditte pouldre, & la destrempez de  
rechef en laditte decoction, & tour-  
nez seicher au soleil. Ce faytant par  
troys ou quatre foys, & puis gardés  
la ditte pouldre bien ferree & quand  
quelcun se sentira frappé de peste,

baillés luy foubdain de ceste pouldre demye once avec eau rose ou de scabieuse : & ce dans neuf heures apres qu'il se sentira frappé. Ce remede à esté experimenté en plusieurs personnes par plusieurs foys , & à fait de grandz effectz , si elle est donnee dans ledit temps.

## REMEDE SINGV-

lier & secret , lequel i'ay eu d'un excellent homme Venitien , docte en toutes sciences , qui de sa grace me le communiqua , & disoit en auoir fait merueilleuses experiences.

**P**renez racine de tormentil'e & du diptam blanc, autant de l'un que de l'autre , boliarmeni laué en eau rose , le gros d'une chastaigne, perles orientales , vne drachme : ra-

clure d'yuoire vne drachme & demie: soit le tout puluerisé subtilement, & incorporé avec conserue de roses en mortier de marbre, & soit gardé en vase de verre bien couuert. Prenés en le matin auant sortir de la maison le gros d'une noix, & beuues par dessus vne pleine culhiere d'argent de ius de gauchet, ou ius de limon, avec du sucre. L'auteur m'a asseuré en auoir donné à plusieurs en temps de grand peste à Venize, qui iamais ne prindrent mal estantz continuellement avec les infectz & malades de peste. Remede en verité notable.

## OPPIATE      CONTRE

*la peste extraicte en partie de Galien, en partie de Dioscorides & autres souveraine a tel effect.*

**P**rens vingt noix communes, figues seiches x v. feuilles de rue & scauerse trente de chacune, racine

cine d'Aristolochie rōde & longue,  
 demye once de chacune , tormentil  
 le, diptam blanc, pimpinelle, bayes  
 de laurier, fleur de borraches , escor  
 ce de racine de Capparis , de chacun  
 deux drachmes & demye , galange,  
 corne de cerf , maris , myrrhe, deux  
 drachmes; boliarmeni, terre sigillee,  
 sel commun, de chacun deux scrupul  
 les : incorpore le tout bien pulueri  
 se avec deux liures de miel bon &  
 bien escumé, & en fay oppiate de la  
 quelle en prendras le matin la quan  
 tité d'vne noix, & boyras apres vn  
 peu de vinaigre blanc rosat avec eau  
 rose : & est ledict medicament fort  
 bon & approprié.

*PERFVM POVR PER  
 fumer la chambre d'vn malade  
 pestiferé, repoulsant l'air infect.*

**P**Rens poix noyre, rafine de pin,  
 encens blanc de chacun six on-

ces myrrhe quatre onces, lignum  
 aloës demye drachme, estorac, ben-  
 ioïn, de chacun vne drachme: bayes  
 de genieure, fucilles de romarin, de  
 chacun deux drachines: soyent ces  
 choses grossièrement puluierisees, &  
 mises sur la brase en vne eschauffete,  
 & la chambre à l'enuiron parfumée.

### POULDRE DE GRAN-

*de vertu contre la peste enuoyee  
 par le Roy Catholique d'Espagne  
 Philippe au Roy Charles Neuſui-  
 me Roy de France l'an 1564:  
 estant la peste presque en toute la  
 France.*

**P**Renés myrrhe choysie & parfai-  
 cte, lignum aloës, terre sigillée,  
 bol d'Armenie préparé, macis giro-  
 fle, safran, de chacun vne once: soit  
 faite pouldre subtile, de laquelle  
 prendrés vne drachme avec eau rose

& ius de limon l'Esté : L'huiuer avec de bon vin. Ceste pouldre ha esté en uoyee aux magestez du Roy & Roy ne pour singuliere. En mon liure des Enarrations medicinales troysiesme liure, & l' narration premiere, j'ay fait vne composition à cest effect extraite de tous les bons autheurs de medecine, principalement de Galien, Paulus Aegyneta, Dioscoride, & Auicenne, de laquelle s'en suyt la forme: Prenez boliarmeni du meilleur vne once, cinnamome fine, demye once, racine de l'herbe appellee pentaphyllon, ou autrement tormentille, de chacune demye once: racine de gentiane troys drachmes. racine d'Aristolochie ronde & longue, racine de iris Florentin, de chacun deux drachmes: racine d'enule Campana, troys drachmes, escorce d'orange seiche, ou de poncyre, qui est beaucoup meilleur

troys drachmes : semence de poncey  
re, ou en son lieu d'orége ou limon,  
semence de naueaux, & d'aygrette,  
de chacun deux drachmes : bayes de  
geneure, girofle, macis, noix mus-  
cade, Zedoare, & angelique, de  
chacun deux drachmes : fucilles de  
romarin, de faulge, de rue, de be-  
toyne, & de chamaipytis, de cha-  
cun vne drachme, bayes de laurier,  
saffran, mastic, encens masle, rac-  
lure d'yuoire, perles blanches, san-  
daulx blancs, rouges, & citrins, de  
chacun vne drachme : fleurs de roses  
rouges, de violettes de nenufar, &  
de buglosse, deux drachmes de cha-  
cune, soit le tout pilé subtilement,  
& soit faite pouldre, ou avec miel  
cuit, ou ius de limon soit faite op-  
piate. La dose de la pouldre est vne  
drachme aux sains pour préservatió:  
& aux malades deux drachmes avec  
eau de scabieuse, ou eau rose, en



Esté: ou bon vin en Huer. Et si l'on la met en oppiate, l'on en peut prendre demye once.

**R E M E D E S O V V E-  
rain & singulier recité par le sei-  
gneur Alexis.**

**P**renez des grains de lhyere qui monte sur les arbres, qui soyent bien meurs, & de ceulx qui regardēt le septentrion, s'il est possible, faites les seicher à l'ombre, & après les mettez dans vne boyte ou sachet de Cuyr, & les gardez comme remede souuerain, & d'iceulx, quant le besoing se presentera, en donnerés en pouldre au malade pestiferé, la quantité d'vne drachme, ou autant qu'il en peult demeurer sur vn escu, avec vin blanc mellez la dite pouldre, & en faites bien couvrir le malade dans le liēt, & il suera, & fault  
e s qu'il

qu'il endure la sueur : & apres luy faire changer chemise, linfeulx & de liēt, s'il est possible. Et par experien-  
ce faite ledit autheur recite merueil-  
les de tel remede en plusieurs, & mes-  
me en vn Milanoys estant en Allep  
de Surie, lequel tesmoigne ayant  
pris tel remede soudain luy estre  
rompu le charbon & bocc en l'an  
mille cinq cens vingt & trois.

**LES ALLEMANS ET**  
*Flamens vsent en temps de peste  
du remede suyuant.*

**P**Renés vne partie d'eau ardent,  
bonne & fine, troys parties de  
maluesie ou autre bon vin excellent,  
graine de genieure demye poignée,  
ou noix cōmunes troys ou quatre,  
& les font tremper dans ladicte li-  
queur troys heures, & puis la man-  
gent au matin & au soir. Ce remede  
est

est bon en temps d'hiver à gens  
vieulx. La theriaque & metridat  
sont excellens remedes en temps pe-  
stilentiel. en prenant vne drachme  
au matin avec du rose ou d'aygrete  
l'Esté : & l'Hiver avec du bon vin.  
Mais fault demourer de manger six  
heures après : & le iour precedent ne  
soupper rien ou bien peu, car autre-  
ment lesditz medicamentz ne font  
leur operation. Voyla les plus sou-  
uerains & exquis remedes pour pré-  
feruer les sains ; tant riches que pou-  
ures en temps suspect. desquelz en  
changeant ( comme dist-est ) l'on  
pourra vser. Mais sus tout fault te-  
nir fort bonne diete & ordre en tou-  
tes choses, & auoir benefice de ven-  
tre tous les iours, qui est vn des  
principaulx pointz pour se tenir sain  
& bien disposé : Mais entre les cho-  
ses plus nécessaires & requises à la  
conseruation de la santé & preserua-  
tion

tion des maladies contagieuses, cest la sobriété, & bonne reigle de viure: car c'est la mere nourrisse de toute bone disposition és corps humains: d'autant que par la sobriété la santé est raffermie & conseruee en son estat. Les humeurs bien temperés, la chaleur naturelle fortifice, les conduytz du corps en leur naturelle disposition entretenus, les opérations de nature chacune en son endroict bien & deuëment accomplies, & par ces raisons la sobriété est le fondement pour se garentir de tout mal; comme l'intemperance au contraire est source de tout malencontre & maladies pernicieuses. Ce que par Hippocrates & Galien est tesmoigné au liu. 2 des aphorismes, aphorisme. 17. & par le mesme Hippocrates au sixiesme des Epidimies, quand il dict le principal soing de la santé, en ce principalement cōsister, cest

c'est d'estre sobre, & ne se fouler de viandes, & faire bon exercice. Ce qu'aussi par Plutarque & Galien es livres touchât de bien cōseruer la santé, est dignement escript. Enquoy se mōstre euidentement l'erreuer de la populace & vulgaire ignorant, qui en temps de peste se chargent de vin, & remplissent l'estomac au plus matin auant que sortir de la maison, par tel moyen pensans coniuurer le temps, (selon leur mode de parler) & abbatre la mauuaise vapeur de l'air, combien qu'il soit tout au contraire. Car le vin pris à iun dispose plus le corps à receuoir infection par la chaleur, & pénétration & ouuerture qu'il fait es conduytz du corps, veines, & arteres, les rendant par ce moyen plus capables à recevoir la mauuaise influence de l'air si aucun en y a. Donques soyent les hommes curieux d'observer ceste digne sobriété.

brieté, s'ilz veulent euitier les dangers de peste, ne vsant de diuersité de viandes, ny se remplissant l'estomac de viandes oultre mesure, ains mangeront sobrement, tant qu'il fera besoing pour sustenter la vie, & nō plus; & faysans vn temperé exercice en lieux plaisantz & verdoyantz, viuront en tranquillité & repos d'esprit, en ioye, liesse & plaisir honneste, euitant toutes perturbations d'esprit, & spécialement tristesse, melancholie, courroux, crainte & effray, qui sont les accidentz plus dommageables à la personne, mesmes en tel temps; comme par Galien en son liure de l'art medicinal est escript; & de telle facon de viure i'en feroys vn chapitre à part, afin que chacun entende quel moyen il doibt tenir pour se conseruer sain par bonne diete & bon ordre.

— — — — — **BRIE**

— — — — —

**BRIEF RECUEIL ET**  
*regime de viure pour preserver les*  
*sains en temps de peste , CHA-*  
**PITRE. VII.**

**L**A principale partie de con-  
server la santé, consiste en  
la bonne façon de viure,  
election des viandes, ordre, mesu-  
re, & temps opportun, quantité &  
qualité d'ycelles: qui sera l'argumēt  
de ce present chapitre. Or donc le  
seul but ou l'on doibt auiser en ce  
cas, c'est pouruoir qu'au corps n'a-  
bondent superfluités & excremens,  
qui puissent seruir de matiere à re-  
cevoir putrefaction & contagion es  
humours. Ce que par la sobriété &  
bonne regle de viure se pourra ac-  
complir aisement. Les hommes cu-  
rieux de leur santé se garderont de  
toute inmoderée repletion de vian-  
des.

des. L'on ne doibt yfer en temps sus-  
pect de diuersité de viandes à vn re-  
pas, pour ne remplir l'estomac, &  
engendrer diuersité d'humeurs: ains  
se contenter d'vne seule viande ou  
deux au plus conformées en nour-  
riture & qualité. L'on doibt cui-  
ter en tel temps viandes qui facile-  
ment se corrompent en l'estomac,  
qui font de gros nourrissement qui  
oppilent, qui esciauent le sang &  
les humeurs, & le rendent vicieux &  
aygu. Comme sont chairs salees, de  
porceaux, de bœuf, moutonnes, le-  
guës, choux, porreaux, aulx, oi-  
gnons, épices, moutarde, froma-  
ge vieux, poisson de palus, vins puis-  
santz & ardans, & vins gros & trou-  
bles. L'on doibt yfer de chairs &  
alimentz delicatz, comme chapons,  
poules & pouletz ieunes, desquelz  
le bouillon rectifie & tempere les hu-  
meurs du corps, comme dit Metue.



Aussi chairs de veau, cheureau, & mouton ieunes sont bonnes, comme aussi tous oyseaulx des champs, perdrix, pigeoneaulx ieunes, torterelles, tordres, & leurs pareilz. Et dans les bouillons des dittes chairs, l'on doit mettre de l'oscille, pourpié en son temps, boutrache, & de l'herbe du foulcy, qui est entre toutes fort appropriée à la peste, comme tesmoigne Alexandre Benedictus en son liure de cest argument. L'on doit vser du iust d'aygrette, d'orange, de limon avec du sucre, & y tremper le pain, ou la chair à l'heure du repas, ou du iust de grenades avec du sucre, & un peu de canelle, ou le iust des somnites de la treille, pillées avec un peu de mente, y adioustant du sucre & canelle en huiuer, & en esté n'en y fault mettre. Aussi le vinaigre rosat en tel tēps est fort bon. Toute pastisserie & viandes de pâte, comme

tartres , rauioles , lausantz , crosetz ,  
& semblables son deffendues en tēps  
suspect , pour la glutinosité d'icelles  
& oppilations qu'ilz engendrent.  
Les œufz fraiz & moulx cuitz en  
l'eau , ou en coque sont fort bons.  
Des poyssons de mer , le rouget , pa-  
geau , bogue , folle , & merluz , sont  
tolerables , mais n'en fault souuent  
vser pour leur humidité & aquosité  
qu'ilz engendrent au sang. A Des  
fruitz d'Esté la preune , perdigonne  
ou imperiale , & la grosse agriotte ,  
& poyre muscade , sont louables en  
petite quantité prises ; les autres  
fructs fault laiser , parce qu'ilz rem-  
plissent les veines de sang aygueux  
& facile à corrompre , sauf la panse  
qui est fort bonne. L'on vsera du  
vin blanc ou claret legier , non fu-  
meux , ou ardent , bien trempé , &  
sobrement pris au repas & non hors  
d'icelluy. L'on fera conuenable  
exerci

exercice au matin en lieux delectable  
& playfantz: L'esté a l'óbre, L'hiuer  
au Soleil. L'on se doibt tenir net  
en ses accoustremens tant de linge,  
que drap, & les changer souuent,  
mesme en Esté, il est duysant chan-  
ger de chemise tous les iours à ceulx  
qui ont la commodité. Se garder  
d'eschauffer le sang par violentz tra-  
uaultx, se tenir en repos apres le re-  
pas. Procurer auoir benefice de  
ventre tous les iours vne ou deux  
foys naturellement, ou ayder nature  
auec les pillules cy deuât ordonnées,  
& ne permette se constupper. Se gar-  
der sur tout de l'vsage des femmes.  
Car n'y a rien en tel temps plus con-  
traire tant pour la debilitation de na-  
ture, que tel vsage engendre, com-  
me par l'esmotion des humeurs qui  
se fait, disposant le corps à receuoir  
infection. Viure en repos d'esprit  
en toute ioye, hyesse, allegresse avec

ses amys , pour conforter le cœur & l'esprit vital, est en tel temps plus requis que nulle autre chose. C'est l'ordre qu'en la façon de viure chacun doibt tenir en temps suspect. Je adiousteray en ce lieu estre necessaire tenir les maisons bien esuentees, nettes, & arrousees d'eau & vinaigre l'Esté, & l'Hiuer de parfums de Genieure, romarin, Estorachs, benioin, & semblables, tenant les fenestres ouuertes au soleil leuât, vers le vent de bize, se gardant du marin & ventz soufflans du lieu contagieux.

### L'ORDRE ET POLICE

qu'on doibt tenir en vne ville en temps de peste, & en quoy doit estre intentifz Messieurs les cōsulz & deputez de la sante pour la conseruation de leurs Citoyens,

## CHAPITRE VIII.

**C**omme en toutes choses qui conseruent l'administratiō de la republicque, l'ordre conduyt par bon aduis & conseil, y est necessaire, tout ainsi en ceste partie qui est vne des plus vrgentes, l'ordre, police & serieuse diligence y sont non seulement vtils, ains tres-necessaires : d'autant que la malādie pestilentielle & contagieuse ayant enuahy vne citē, est la totale ruyne d'icelle, par le dangier & degast des Citoyens : comme nous lisons en Thucydide de la grand' peste de Grece qui raut la pluspart des Grecs : & en Tite Liue, de plusieurs horribles pestilences aduenues à Rome, qui par leur grandeur & cruaulté mirent celle Citē en extermination de plusieurs & bons Citoyens, apportant famine & indigence en icelle. Par

quoy ceulx qui ont l'administration publique, consulz, Escheuins, mai-  
stres de la santé, doiuent sur toutes  
choses procurer que leur Republi-  
que demeure en son intégrité, pour  
& afin que les Citoyens sains de  
leur personne, puissent communie-  
quer les vns avec les autres, traffi-  
quantz & faisans leurs affaires: ce qui  
redonde au profit & vtilité du com-  
mun: comme par le contraire estat  
contaminee vne Cité par infection  
& maladie populaire, le commerce  
cesse, & qui est de plus grand peril &  
importâce, la vie & santé de tous est  
en danger. Et pour à ce prudemmet  
obuier, fault en premier lieu que les  
Magistratz soyent diligens à enten-  
dre les lieux voyfins ou lointains cō-  
taminez de telle maladie, pour ga-  
rantir le leur de mesme infection. ne  
donnent entree à ceulx qui viennent  
de lieu infect, si ce n'est à personnes  
de

de marque, & desquelz l'on se puisse asseurer de leur santé & preudhomme. Car il n'est necessaire que tous les habitans d'une Cité infecte soyent infectz: mesmes quant ce sont personnes de respect, qui ont moyen de se contregarder. En quoy est bien duylant que les gouverneurs des villes & gardes des portes ayent consideration: mais aux vagabons, defa-uoués & gens de seruille & basse condition, venans de lieux suspectz, l'on ne doibt donner entree. Et si par cas fortuit, ou vouloir de Dieu, la Cité se tienne infecte, ne fault incō-tinent la descrier, ains par les Maistres de santé doyuēt telz excès estre couuers du commencement: en quoy leur prouidente sagesse seruira de conduyte, ne declarant le fait au populaire, sauf aux personnes de respect & conseil, qui peuuent par leur bon aduis servir d'ayde à tel affaire.

Ce que par nostre saint Hippocrates en son ferment & attestation ha este commandé aux Medecins, & à tous conséquément qui ont charge de maladies, de ne reueler ce qui doibt estre caché pour l'vtilité publique. A quoy aduisant le diuin Platon au liure troyfiesme de la Republique, disoit estre loysible aux Magistratz & Medecins de mentir pour le salut & conseruation de la cité : & à ceste mesme fin cacher souuēt la verité, & ce n'estre point en coulpe aux ditz quand par tel mensonge l'vtilité publique est conseruee. Ce que j'ay bien voulu dire pour reprimier la superstitieuse fantasie d'aucuns qui ne veulent rien cacher de tel fait : ains le declarent à tous, plus que besoing n'est, pour crainte de n'estre reputés menteurs. Les Magistratz doibuent tenir bons & notables hommes aux portes en tel tēps,



de la preud'homme & fidelité desquelz la Cité se puisse tenir asséeuree. & par ce aux meilleurs Citoyens, par leur tour & rang, telle charge doibt estre donnée, non a gens ieunes, indiscretz, & inconsiderés. Ce que par le diuin Philosophe Platon ba esté bien noté liure deuxieme de la Republicque, disant, le gardient de la Cité deuoit estre robuste en personne & faitz, & Philosophe en l'esprit, cest assauoir sage, prudent & bien aduisé : Car de tel gardient bien qualifié, reuient grand profit à tout le commun: comme d'un qui fera tout au contraire, vn grand dommaige.

En oultre doiuent auoir cūre les Magistratz que la Cité soit tenue nette de toute souilleure, ordure, infection & puāteur: d'autāt que telles immondicēs faifantz euaporation en l'air le rendent contaminé & infect de plus en plus. Et à ceste occasion

disoit Hippocrates qu'en tel temps  
l'on doibt vser d'air qui soit pur &  
net, & tout contraire à l'air infect.  
Comme aussi l'a confirmé Galien  
au premier liure touchant de conser-  
uer la santé, & au Commentaire sur  
le liure De la nature humaine. Et  
par cè doivent commander à chacun  
endroit de tenir les rues nettes, &  
tous les iours les nettoyer, defen-  
dre de y mettre ne ietter aucunes im-  
mondices ou puantises sur peine de  
l'amende. Aussi doivent don-  
ner ordre que la tuerie des bestes ne-  
cessaire pour la nourriture des habi-  
tans, ne se fasse dans la ville, ou a  
tout le moins la colloquer à l'extre-  
mité d'icelle, hors de la conuersatio  
des hommes, & en lieu separé & pro-  
che à l'eau, pour pouuoir nettoyer  
le sang & souilleures des bestes mor-  
tes. Ce qu'en ceste nostre bonne  
ville d'Arles à present est fort bien

accommodé, ayant esté construyte la tuerie au bout de la ville, lez le Rosne, ou au parauant estoit au milieu de la cité: chose grandement prejudiciable à la santé. Comme lors par moy fut donné aduis & cōseil d'icelle transmuer: ce que par la prudence de messieurs les Cōsulz fut soudain mis en effect. Il n'est non moins necessaire de se bien donner garde des malades qui iournallemēt accourent en la ville, pour scaüoir de quelle maladië ilz sont enuahis, si elle est suspecte, ou non. Parquoy est besoing ordonner gens honnora- bles & discretz, distribuez par les quartiers & parroices de la ville, qui ayent charge de s'informer particulierement des chefz des maisons de la santé de leur famille: & là voir en presence, ou en prendre fidele rapport du pere de famille: & si aucuns se trouuerōt malades és maisons, en faire

faire le rapport à messieurs les députés de la santé, pour s'y transporter, & faire visiter le malade par leurs medecins : scauoir si telle maladie est contagieuse ou non, pour y dōner secours fidelle & prompt selon l'exigence du cas. Et pour ce qu'en toutes les villes suspectes, l'on ha de coustume par ordonnance de messieurs les Maistres de la santé, d'enfermer ceux qui sont attaqués de tel le maladie contagieuse, ou bien les enuoyer à l'hospital des infectz, à ce député, pour & afin que par leur presence & frequentation avec les sains, ne communiquent par attouchement ou contagion leur mal, estāt fort dangereux conuerser avec eux, comme par Galien à esté dit, & est aussi commandé par expres commandement de Dieu au Léuitique, Chap. 13. & aux Nombres Chap. 5. parlāt des lepreux, qu'il commanda estre separés

separés de l'ost & compagnie des sains : il me semble fort necessaire toucher ce point à present , & iceluy espluscher au vray , pour entendre la qualité de tel fait. Or en verité le deuoir commande separer telz malades d'auec les sains : pour ne les contaminer de mesme mal: mais toutesfoys en tel fait ne fault faire telle separation , qu'au preallable ne soit bien verifié le mal , s'il est de telle qualité qu'il merite estre traicté par separation. Car c'est en verité grand effray , & non moindre horreur, de separer l'enfant du pere & mere , le mary de la femme , la femme du mary , & les confederés de leurs adherentz & amys. Et pour y deuement proceder, me semble telle separation ne deuoir estre faicte, que par le iugement du scauāt medecin ne soit iugé la maladie estre telle. Et ores qu'elle soit trouuée de pareille qualité. si est

il necessaire d'vser d'humanité enuers  
telles personnes. Et si les parentz &  
amys ont moyen de secourir leur  
malade : & que librement & de bon  
cœur le vueilient faire, Messieurs les  
deputés de la santé leur doiuent per  
mettre cest office de charité enuers  
leurs malades : à la charge toutesfois  
qu'ilz se tiennent a part, & ne fre  
quentent avec personne. Car pour  
en dire la verité, vne des principales  
occasiōs de la mort de telz malades,  
oultre le dangier de la maladie, est  
l'effray & peur qu'ilz se donnent, se  
voyāz deboutez de secours & mains  
de leurs parentz & amys, & estre  
mis en mains estrangieres, & bien  
souuent peu affectionnees. En leur  
endroit, ayantz faulte de bon serui  
ce & secours. Et par ce en cest en  
droit y fault proceder fort discrete  
ment & modestement. Et au regard  
du temps que les suspectz & mala  
des

des, ou bien ceulx qui les ont seruis & frequentés doiuent estre tenuz enfermez, il y doit auoir reiglement & moderation. Car ores que par la coustume ancienne & obseruation l'on leur donne pour terme prefix quarante iours, ce terme toutesfois ne doibt egallement & rigoreusement estre obserué en tous. Aux malades de telle maladie pestilentielle ce terme leur doibt estre ordonné: & encores pour plus grande assurance, doiuent oultre les quarante iours demeurer encores vingt iours, qui font en tout soixante, au parauant qu'il leur soit donné'entree en leurs maisons, ny frequentation avec le peuple. Avant laquelle doiuent lesditz malades apres leur guerison chāger du lieu ou ilz ont estez malades, & s'esuēter en autre lieu sain, estoigné d'infection, & changer à neuf leurs accoustremens, & laisser les au-

dob

tres,

tres, ains les brusler de peur qu'ilz n'endommangent ceulx qui les pourroyent vestir apres eux. Car à la verité en ce y court grand dangier, & d'ou apres la peste cessée l'on la voit repulluler souuent sans occasion, laquelle vient par telz accidentz. A quoy doiuent estre intentifz messieurs les deputes de la santé.

Nous auons par cy deuant dit du terme qui aux malades doit estre ordonné, disons maintenant du terme qui doit estre estably à ceulx qui les ont seruis, pour en demeurer assurez. En quoy à mon iugement (sauf toutesfoys le meilleur des plus accordz en ce fait) il fault obseruer les reiglementz suyuantz cy, apres auoir: Si le malade est mort en sa maison, ayant fait tout le discours de sa maladie en ce lieu, & les parétz & amys demeurantz en icelle luy ayent assisté continuellement, ilz doib



doibuent demeurer enclos ledit terme de quarante iours, ou bien se transporter à leur meterie, si point ilz en ont, ou en leur iardin à part & separés, sans frequenter le peuple dās tel temps. Si le malade n'a demeuré en la maison que deux ou troys iours n'y ayāt en grand frequentation, & les assistants soyent gens discretz, se saichantz bien contre-garder & preseruer par bons remedes & façon de viure, culx estantz gens de respect & de merque, ne doiuent estre si longuement detenus; & suffira en ce cas les tenir vingt ou vingt cinq iours en fermés, au plus long. Car en tel terme par raison naturelle le venin doibt auoir fait son exploit, si point en est conceu aux assistants. Mesmes si iceulx se sont bien purgés & ont prins remedes præseruatifz dans ce temps. Car à la verité si vne vapeur ou contagion est dans vn corps, elle

ne peut si longuement demeurer en close, qu'elle ne fasse son effort deuant le terme de quarante iours. Et si dās l'espace de vingt & vn iour elle ne se monstre (ou la nature moleste'e d'aucune maladie aigue ou contagieuse accoustume de faire ses operations & expulsion, pour icelle expulser; comme aux liures des iugemens, & au liure des iours Critiques est par Galien declaré) à peine se montrera elle aux iours ensuyuantz le vingtyniesme. d'autant que ia le venin est affoyoli en sa force, & la nature ne tient plus conte de l'expulser ains s'euapôre insensiblement sans autre nocument, si ia d'ailleurs ne suruient nouuelle occasion qui cause tel accident, comme il se voit souvent aduenir. Si aucun va visiter vn tel malade en sa maison ignorāment, & ce pour vne ou deux foys, ne luy doibt estre prefix tel terme. ains suffira

ira se tenir reduyt quatorze iours  
au plus, obseruant toutesfoys bon  
regime, & pour en dire resoluement  
ce qu'il fault de telle matiere, de te  
nir enfermez les malades & assi  
stans en temps de peste, il est neces  
saire s'en resouldre selon les ef  
fectz & accidetz que l'on voit  
aduenir és dittes maisons, & selon  
le regime obserué par ceulx qui sont  
enfermés, selon ausy leur qualité  
& condition, & principalement s'en  
doibt-on rapporter au iugement du  
fidele & docte Medecin, qui selon  
son art & effectz qu'il verra és di  
ctz enfermés, pourra faire assure iuge  
ment sur tel fait: auquel fault adioul  
ter foy comme à propre iuge en tel  
le matiere. Car à dire verité telle cou  
stume à esté nouuellement introduyt  
te, & ne se treuve enregistree en au  
cuns de noz aucteurs authentiques,  
soyent Grecs, Arabes, ou Latins.

sauf quelques modernes praticiens,  
 comme Gnaynerius & quelques au-  
 tres, lequel Gnaynerius en son trai-  
 cté de peste Chap. 3. de la tierce diffe-  
 rence, a mis ce terme de quarante  
 iours; parlant du temps que l'on  
 doit rentrer en vne maison infecte.  
 Et selon son opinion il ordonne  
 (mais contre la verité) troys mois.  
 Car si la maison infectee sera bien  
 nettooyee de toute infection, perfu-  
 mee, & esuentee par les deputez à ce  
 establis, l'on y peult rentrer apres  
 quarante iours: pourueu qu'en la dic-  
 te maison n'y ait demeuré rien d'in-  
 fect ou maculé du malade, comme  
 habillemens, linge couuertes de liç,  
 matelas, ou Coultres. Car telles cho-  
 ses gardent longuement l'infection  
 enclose en eulx, mesmes les coultres  
 de plumes comme tesmoigne Alexā-  
 dre Benedictus en son liure de peste,  
 de la coultre d'un malade pestiferé.

Venize ; qui conserua le venin sept ans, & les premiers qui y dormirent au bout dudit terme furent attaquez de peste soudainement, comme il recite Chapitre 3. dudiect liure. Voylà ce que sur le terme des iours m'a semblé estre mon aduis expedient de dire ; toutesfois me submettant supposant tousiours au reiglement des plus doctes : auquelz ie defetelleray tousiours, me conformant à toute verité doctement fondée, & bien à point demonstree. Ce qu'un chacun amateur de lettres doit faire, & ce que de ceste matiere en ay dit n'est seulement que par maniere d'instruction aux moins sçauantz ; qui n'ont congnoissance de lettres, afin qu'eux estantz à la charge des députés de la santé puissent par ceste petite information estre mieux resolu. Et faire les choses par raison & bon ordre, comme à eux appartient : & ne

se tenir à l'opinion du vulgaire, d'enfermer egallement toutes gens par mesme terme & longueur de temps, ains ( comme dit a esté ) il y fault faire difference des vns aux autres , par les raisons que dessus. Ce qu'à present suffira, quant à ceste partie assez deduyte. Doyuent aussi entre autres choses Messieurs les deputez de la santé estre curieux de ceulx qu'ilz ont ainsi par telle occasion enfermés , ou enuoyés à l'Hospital, estârz malades, pouruoians que rien ne leur manque de ce que pour guérison de leur maladie & conseruatiô de leur personne verront estre nécessaire. En quoy , si telz malades sont pources & indigens , fault que la charité & liberalité de la ville y supplie. Et s'ilz sont riches, & par telle occasion enfermés, leur faire bail-ler tout ce qui leur est nécessaire, attendu qu'ilz ne peuuent faire ce de-  
voir

voir d'eulx mesmes.

DE LA CONSTRV-

Elion de l'Hospital pour la peste,

CHAP. IX.

**L**A chose plus necessaire aux  
bonnes cités c'est auoir cer-  
tain lieu deputé pour reti-  
rer les malades pestiferés quand il  
plait à Dieu enuoyer son fleau sur  
nous. Et par ce appartient à la police  
publicque, au parauant que la neces-  
sité suruienne, auoir pourueu de  
maison bien construite selon la for-  
me que cy apres sera descripte, pour  
receuoir ceulx qui de telle maladie  
pestilente seront attaqués, & qui  
n'ont autre moyen se secourir, sauf  
se retirer à l'hospital, pour y estre  
entretenus à leur necessité. Or donc  
la ditte maison doibt estre située  
hors de la ville, en lieu separé de la  
frequence des hommes, & non en

*Situati-  
on de l'hosp-  
ital pour  
la peste.*

chemin public ou passage commun; ains arriere-main, pour garder que les passans ne prennent l'infection. La dite maison doibt estre ample & capable pour receuoir plusieurs malades en temps de necessité. Son aspect doibt estre entre l'Orien Equinoctial & le Septentrion; a fin que la chaleur du mydine l'eschauffe par trop, & l'Esté ait competente fraischeur. Ce qu'elle aura estant ainsi bastie. Car telle maison fault que receyue librement le Vent de Septentrion qu'on nomme vulgairement le téps droit, estât celuy le plus sec, le plus sain, & qui plus purge & chasse toute mauuaise vapeur & infection de l'air estât icelluy froit & sec, & qui plus consomme les superfluitez du corps. Comme par Hippocrates & Galien au liure troisieme des aphorismes; & par le mesme Hippocrates aux liures Du mal feint, & au se-



cond. touchant la maniere du viure  
est doctement tesmoigné. Ce que  
par Auicenne est plus amplement e-  
script, quand il parle de la nature de  
ce vent Septentrional, auquel il at-  
tribue ceste proprieté de corriger  
tout air pestilenciel & corrompu.  
Et par ce est nécessaire qu'elle ayt tel  
apert qu'il est dit. Et fault qu'en  
longueur soit plus estendue qu'en  
largeur, pour y pouoir construyre  
du moins x x v. ou x x x. chambres  
au dessus, & autant au dessoubz:  
car pour la multitude des malades  
qu'il y pourroit accourir est de be-  
soin y auoir deux estages, l'un des-  
sus, l'autre dessoubz. Les chambres  
doibuent estre separees l'une de l'aut-  
re, & ce neantmoins s'entresuyuas  
comme les chambres des Religieux  
en leurs dortoyrs. Et chacune doibt  
auoir sa cheminée, ayguier, & neces-  
saire estantz percees les dites cham-  
bres

bres à deux faces, ayantz fenestres l'une vers le Soleil Leuant, l'autre vers la bize ou Septentrion. Et en chacune d'icelles y doibt auoir deux lietz pour changer le malade de l'un à l'autre, ce qu'en ceste maladie est fort requis. Le lieu dudit Hospital doibt estre en air salubre, libre, euen té, & non en lieu de palun & marais: ains en lieu esloigné de telle qualité, & sec, ayant toutesfois l'eau ou de fontaine ou de Ruyseau courant à l'entour, s'il est possible, pour nettoyer leurs drappeaulx & autres souilleures, & si la nature du terroir n'est telle, qu'il soit tornoyé d'eau, il y fault faire des puyz de bonne eau costoyés de grandz piles longues, & larges, & capables pour nettoyer ce que besoing sera. La chambre du Chirurgien & du prestre deputez à la peste, doibuent estre separees de celles des malades en vn coin à part.

comme aussi celle de l'appothiquaire, lequel doit auoir vn lieu à part pour faire sa boutique, laquelle il doit tenir fornée de drogues & vnguentz necessaires à tel effect. Ce qu'aux villes bien policees est coustumierement obserué. Il est aussi de besoing qu'au paruis des chambres y ait vne allee ou gallerie longue & ouuerte, pour en icelle se pouoir pourmener quand les malades commencent estre en conualescence, & qui tire de long en long iusques au bout de la maison. Car non seulement icelle gallerie sert à ce que dit est, ains aussi à estendre couuertes de lietz, robes & autre mesnaige ce qu'est fort d'uylant & commode en tel cas. Au costé du dict Hospital, & loing d'icelluy environ Cinquante pas, doit-on construyre vn autre corps de maison moindre toutesfoys que l'autre, pour seruir à des

infe

infecter les malades apres qu'ilz seront gueris : lequelz pour ne demeurer avec les plus malades est rayso- ble & necessaire les changer de lieu qu'ilz ne cōuersent avec les malades & estantz en air separé & plus sain, soyent entierement garantis de dangers, & remis, moyennant l'ayde de Dieu, en leur sante premiere. Ce que par ce moyen ce pourra aysement obtenir. Aussi est necessaire y construire vne chapelle qui soit separee du corps, & en tel lieu situce que de loing les malades puissent ouir ceux qui leur annonceront la parole de Dieu. C'est l'ordre & construction appartenante à ladicte maison, laquelle par la liberalité tant de la ville en commun, comme en particulier de ceux qui ont le pouuoir, doit estre meublee de bons lietz cou- uertes, matelas, & autres choses necessaires au seruice des malades: en quoy

tous ceulx qui ont le zelle de Dieu  
 en leurs cœurs, & qui ont le moyen  
 de distribuer de leurs biens aux pou-  
 ures, doibuent estre diligens & cha-  
 ritables pour en receuoir le guerdon  
 à eulx promis quād leur sera dit, Ve-  
 nés à moy benéitez de mon Pere par- *Matt. 23*  
 ce qu'estant malade vous m'avez vi-  
 sité, & ayant faim vous m'avez don-  
 né à manger: i'estoye estrangier, &  
 vous m'avez receu. Possedez le Ro-  
 yaume qui vous est appresté dés la  
 fondation du monde. C'est vn mer-  
 ueilleux loyer pour vn bien terrien  
 & caducque fait à ton prochain d'ac-  
 querir la gloire eternelle de Paradis,  
 thresor & felicité incomparable.  
 Voila le tout quand à la matiere pro-  
 posée.

DE LA FESTE  
 D'UN VIEUX  
 HOMME

stiferez tant en leur viure, cham-  
bre, liect, & remedes conuen-  
bles aux bubons & charbons pe-  
stilentiels. **CHAP. X.**

**D**Epuis que la maladie a oc-  
cupé le patient, ce que par  
les signes & accidentz pro-  
pres est cogneu, de la fiebre presen-  
te, legiere exterieurement, & non  
par trop aygue, ains lente : mais in-  
terieurement maligne, angoyseuse,  
donnant grand trauail au malade,  
inquiétude, mal de cœur, vomisse-  
ment, defailement de cœur, synco-  
pes, soif extreme, douleur en tout  
le corps & lassitude, avec apparence  
de morbilles, que le vulgaire appelle  
le tac, ou de bubons aux ayelles,  
eines, & aupres des oreilles, avec char-  
bons en quelque partie du corps.  
Lors il est euident tel personnaige  
estre

estre attainct de peste par telz signes & accidentz: mesmes si le personnaige au parauant aura frequenté en lieu suspect, ou avec malades de telle maladie. Et estant en lieu où telle contagion ha son cours, & y faiet progrès. Par telz signes & accidentz, peult-on congnoistre la nature d'icelle maladie, comme par Auicenne & Rasis est tesmoigné: ores qu'icelle maladie est si fraudulente & deccuable que bien souuent, ains le plus, elle decroit & le malade & le medecin, comme dit Auicenne apres Galien. Car plusieurs de telz malades ne pensantz estre attainz de telle contagion n'en font compte du commencement: mesmes na'yantz pour le premier ou second iour que seule & lente fieure, sans autre apparence, & nature ne layssé pour lors de faire ses operations, n'estant encores enuahye du venin. Parquoy les malades auront bon

bon poulx, & bonne vrine, presque  
comme s'ilz estoient en leur santé, &  
soudain l'on les voit mourir sans  
occasion manifeste, qui faict grande-  
ment doubter les medecins, & de tel  
euuenement estre troubles, comme  
par Galien & Auicenne est dit. Par  
cette raison ne se fault esmerueiller si  
les iugemens des medecins en telle  
maladie sont ambiguz, difficiles, &  
obscurs, estant icelle maladie occulte  
de son naturel, fraudulente & dece-  
nable. Ce neant-moins quand avec  
la fiebre le signe ou charbon s'appa-  
roit, il n'en fault doubter. Et lors y  
fault promptement obuier tant par  
diète conuenable, que par medica-  
mentz exquis & propres, soudaine-  
ment & diligemment ordonnés: car  
telle maladie ne donne temps ny loi-  
sir de delaier sans dangier de mort.

Et par ce disoit Hippocrates en tel-  
les maladies estre expetere du mē-  
me



me iour & instant y remedier par euacuations & aultres moyens. Or donc par ce que vue des principales intentions du medecin en ce cas, est rectifier l'air, & prohiber que le venin ne face son operation d'ans le corps, nous commencerons à icelle, & de degré en degré viendrons aux aultres.

## PREPARATION DE la chambre.

**E**N premier lieu doit-on eslire la chambre du patient qui soit ample & bien eueuée, s'il est possible, ayant les fenestres vers le Septentrion ou soleil leuant. Et s'ilz est en temps d'esté tenir les fenestres du Septentrion ouuertes, afin que l'air de la chambre par le vent Septentrional soit purifié & purgé, doit eslire nettoyer la chambre deux ou troys foys

le iour, & arrousee tant le paué que les murs d'icelle de bon vinaigre rosé, meslé avec eau commune, ou eau rose, si le malade est riche. Et sera la-ditte chambre tapissée de belles fleurs & herbes odoriferantes assauoir en Esté de fleurs de roses, de violettes, de toutes sortes d'œilletz, de fucilles de fause, de canes, de pamppe de vigne, de nerte, & orange au lieu la où il en y a commodité: comme en Prouence & riuere de Genes: car la senteur des fleurs, fruitz, & fucilles des Citrôs, oranges, & limons, est en ce cas de merueilleux effect, ayant puyssance & vertu de repoulser tout venin & air contagieux: comme par Auicenne est tesmoigné, & nous auons au parauant dit. Aussi est bon auoir en icelle quâtité de pommes de coingt & citrons, pour rendre l'air odoriferant. Et n'est impertinent en quelle saison que ce soit faire legier feu à la  
 cham

chambre l'Esté : car il purge merueilleusement l'air infect. Et si c'est en hyuer, l'on fera grand feu en la chambre de boys de romarin, de laurier, geneure, de fermentz de vigne : & autres semblables, faysant parfumer la chambre avec benioin, storax, encens, girofle, grains de geneure ou avec oysselletz de chypre, ou celle mixtion qu'on appelle cassiolette, qui est à tel effect fort excellente. mais c'est tant seulement pour les riches, & non pour les pourceurs, qui n'ont tel pouuoir. Et si le patient est de qualité qu'il puisse changer de chambre, seroit bon de deux en deux iours ce faire, estant icelle preparee comme dit est.

**L**E liét du patient doit estre ample, net, parfume de bonne odeurs, selon la saison du temps, comme auons dit cy deuant. Et doit

changer le patient de linceulx tous les iours s'il est possible, & de chemise deux foys le iour, s'il a le moyē & pouuoir de ce faire, ou à tout le moins chacun iour en chāger. A l'entour du liēt, si c'est en esté, & au dessus des couuertes serōt fleurs, fruitz & rameaux odoriferans, puis le malade tiendra aupres de soy force pommes, oranges, limons coingz, pour odorer souuent. Et s'il est riche fera tremper de l'insculz dans vinaigre bon & eau, & les mettra à l'entour du liēt non seulement pour re-  
frechir le lieu, ains pour repousser la mauuaise vapeur de la chambre: & le malade se lauera souuēt les mains, les poulx des bras, le front & visage de ceste mistion. Prends vinaigre rosat blanc, quatre onces ou demye liure, eau rose & nasse de chacune demye liure, de bonne maluaisie, ou vin blanc, ou claret excellent quatre  
onces,

onces, pouldre de zedoare, de girofle, roses seiches, & musc deux grains: le tout puluerisé & meslé ensemble, s'en frotera le nez, les oreilles, mains & face, car cela viuifie & conforte le cœur & esprit vital d'icelluy, & chasse toute mauuaise vapeur. Voila la preparation pour la chambre & liét du malade pestiféré. S'ensuyt la façon de viure d'icelluy.

## REGIME DE VIE

pour le malade frappé de peste.

### CHAPITRE XI.



Autant qu'en cette maladie l'appetit se pert, & la vertu de l'estomac & de tous les membres est fort affoybiye, il fault que les malades s'esuertuent à manger pour resister au mal, & refociller la vertu,

comme commande Auicenne, disant  
que ceulx qui virilement s'efforcent  
en ceste maladie & mangent coura-  
geusement sont ceulx qui eschappēt.  
Donc le manger du patient doibt e-  
stre en quantité modéré, prins petit  
& souuent, & en qualité sustantieux  
& nutritif, & temperé avec choses  
qui repugnent au venin. Soyent les  
viandes de bon nourrissement, de fa-  
cile digestion, & plaisantes au goust  
comme sera cy apres dict: car cela  
donne appetit au malade, & le fait  
efforcer à l'auantaige à son profit.  
Les viandes soyent chapponeaux,  
poules, & pouletz, ieunes cheu-  
reaux, veau, & mouton, perdrix,  
tortourelles, grue s, tordres, beca-  
fiz & fezans: & les bouillons desdit-  
tes chairs sont tresbons: ausquelz  
fault faire cūyre oseille, laiētue bou-  
rache, pimpinelle, fucilles de Gan-  
chet: car en ceste maladie ha tresgran-  
de

de vertu, comme tesmoigne Alexander Benedictus en son liure de peste Chap. 23, mais ne faut mettre de toutes ensemble, ains souffira de l'vne ou de l'autre: & dans iceulx bouillons est fort approprié y adiouster vn peu de ius de Limon, ou d'orange, ou aygras en sa sayson. Le pain & la chair qu'il mange, doiuent estre pris avec ius de limon, de citrô, oranges, ius de grenade, vinaigre rosat, verius de grain, ius d'oseille, chageant tous les repas de l'vn à l'autre. E si l'aygreur luy faisoit mal à l'estomac, l'on y pourroit adiouster vn peu de ius de mente, avec du sucre & vn peu de Cinamome. L'orge mondé, laict d'amède, Pain laué sont louez en cecy, comme aussi les œufz fraiz & molletz, & pouchéz en l'eau, pris avec ius d'oseille & vn peu de sucre. Et entre les viandes fort restauratiues de la vertu c'est cette cy

qui s'ensuyt: Prenez quatre moyeux  
d'œufz fraiz, leué le germe blanc qui  
y est adherent, broyes les dans vne  
escuelle de staing ou d'argent, y ad-  
ioustant demy verre de bon vin blac  
ou claret bien trempé avec eau pure  
ou eau rose, & le tout bien melle y ad-  
iousterez vne once ou vne & demye  
de bon sucre fin, vne drachme de  
bonne cannelle fine & le tout ferez  
boullir lentement à feu clair, dans  
vn petit vaisseau de terre entuernissé,  
& que seulement il demeure au feu  
iusques à ce qu'il cōmencera à boullir,  
le remuant tousiours avec vne  
cullier d'argent, & tout d'vne main,  
& ainsi le seruirez au malade: qui est  
vne viande de grand nourrisement,  
& fort restaurative de la vertu, & les  
Italiens l'appellent du Sambaion. Le  
coulis aussi est de fort bon nourrisse-  
ment, quant les malades ne peuuent  
manger, ausquelz faudra supplier  
avec



avec telles menestres substantieufes  
& restauratiues. Le boyre du patient  
sera vin blanc ou claret bon & en-  
tier, mais non fumeux, bien trem-  
pé avec bonne eau de fontaine pure,  
s'il eſt possible, ou eau de pluye: car  
à cause de la foyblesse de la vertu en  
cette cruelle maladie, & pour resi-  
ster à l'operation du venin, n'est ne-  
cessaire leur oster l'ysaigé du vin, si  
ce n'estoit que le malade fut fort san-  
guin, ieune, replet, & fort en vertu.  
Auquel cas seroit meilleur luy prohi-  
ber que luy permettre. Hors du re-  
pas boyra eau d'orge, dans laquelle  
tremperont quelques fucilles d'oseil-  
le, & avec l'eau d'orge y meslera du  
sirop de limons, sirop de suc d'agret-  
te, sirop de laygre du ponceyre, sirop  
d'aygras, sirop Alexandrin, ou vio-  
lat. Et si le patient ne veult boyre eau  
d'orge, boyra eau de fontaine, ou de  
pluye boullie, & meslee avec vn des

fusditz sirops. Et doibt le patient en  
cette fiebure boyre largement d'eau,  
& tout son soul, pour esteindre l'ar-  
deur interieure de la fiebure pestilen-  
tielle & non à petitz traitz, ains co-  
pieusement, cōme cōmandent Pau-  
lus Aegineta, & Auincenne en ceste  
dispositiō estre necessaire. ce que ser-  
uira aux malades & à leurs assistants  
de conseil & auis, pour en aduertir  
les malades & les cōtraindre à boyre  
largement, & puis les couvrir pour  
prouoquer la sueur qui est l'euacua-  
tion plus propice pour leur gueti-  
son.

**REGIME DE LA SEI-  
gnée, des potions & euacuations  
necessaires pour le malade pestife-  
ré, CHAPITRE XII.**

Incon-



Ncontinent que le malade par les signes que dessus se sont frappé, il le faut secourir tresdiligemment. Car la maladie ne donne aucun loysir de delay sans danger de mort, pour sa malignité du tout contraire à la vie de l'homme. Parquoy y fault proceder avec extreme & soigneuse diligence: pour prohiber que le venin ne face son operation mortelle dans le corps, & luy rompre sa force au plus qu'il sera possible. Or donc soudainement soit donnee au patient telle potion. Prenez ius de l'herbe nommee en vulgaire Gauier ou Ganchet, qui est fort commune & cognue de chacun, & qui flourish tous les moys: & les iardins en sont plains, faisant icelle la fleur iaulne, de iaulne doré, & se nomme en Latin Calédula vel Chalta: par ce qu'elle flourish tous les premiers iours du moys

moys que les Romains appellent C  
lendæ, Prenez (di. ie) du ius de cete  
herbe la quantite de deux ou trois  
onces au plus: donnez la a boyre au  
patient avec vn peu de bon vin blanc  
ou eau d'aygrette: & le faites bien  
couirir pour fuer. Ce ius rend l'hom  
me libre & assure de tel venin, com  
me tesmoigne Alexander Benedi  
ctus en son liure de peste, & est vn  
bon & notable secret: & s'il fue apres  
l'auoir beu, il sera assure de sa gue  
rison, moyennant l'ayde de Dieu.

Au lieu de la susditte herbe prenez  
du ius de la berbeine en mesme qua  
tite, ou du ius de l'herbe nommee  
scabieuse, qui est de fort grande ver  
tu & efficace en ce fait, & en don  
nez deux onces dudit ius avec vin  
blanc ou eau rose ou d'aygrette, &  
verrez merueilleux effect. Or ces re  
medes doibuent estre donnez soub  
dainement. Car si le malade a demeu

vn iour ou deux sans se plaindre,  
 ne font plus leur effect.

## DE LA SAIGNEE.

Subdain que le malade est frap-  
 pé, s'il est sanguin, ieune & re-  
 plet, doibt estre seigné par les rei-  
 gles que s'ensuyuent cy apres. Si  
 le signe ou bubon n'apparoit encores,  
 il fault seigner la veine mediane du  
 bras droit, plustost que du gauche,  
 pour deffendre que le venin n'aille  
 au cœur, & en tirer selon la repletiō  
 & vertu du patient. Ou pour plus seu-  
 rement proceder il fault seigner la  
 veine sophene entre la cheuille & le  
 talon, pour esloigner le venin des  
 parties nobles, ou bien au lieu de la  
 seignée appliquer yentouses avec  
 scarification aux espaulles & aux fes-  
 ses. Aux fortz & robustes & bien co-  
 nexionés se peult tirer du sang ius-  
 ques

ques à six onces, aux moins de troys à quatre onces, & aux debiles nullemét. Et notez qu'en ceste maladie ne fault gueres tirer desang, ores que la seignee y soit necessaire, par ce que c'est le thresor de vie duquel nature a besoing pour resister au venin. Et aussi que par la grande seignee la vertu se debilité & le venin s'esmeut d'auantage, comme sera cy apres declaré. Et quand l'on seigne le patient, l'on luy doit faire tenir à la bouche, ou vn peu d'orange, ou de limon, ou girofle, ou Cannelle, ou bien vn peu de vinaigre rosé meslé avec d'eau Rose, pour conforter le cœur & l'esprit vital. Si le signe ou bubon s'apparoit, la seignee se doit faire du costé du corps duquel apparoit ledit signe: assauoir, si le bubon se monstre derrière l'oreille droyte seigne la veine Cephalique du bras droit, & ainsi de la gauche.

Si le signe apparoit deffoubz les aiscelles frapperas la mediane du mesme costé, assavoir du bras droit. Si l'apostume est soubz l'aiscelle droite, & de la gauche mesmement, quand elle se monstre soubz l'aiscelle gauche. mais en verité il est plus seur seigner les veines des iambes en ce cas que des bras pour attirer au plus loing le venin. Si le signe se monstre soubz les aines, frappe la fophee du mesme costé ou bien la veine qui arret au dedans, si elle se peut trouver, & tout le mesme du charbon en fault faire, quand il s'apparoit, mais ne faut reiterer la saignée, sans seulement la faire du costé où l'apparoistra le charbon. Mais notez en ce cas de la seignée, qu'elle se doit faire au paravant que le patient ay demeuré infect vingt & quatre heures, car apres ce terme escheü, la seignée est dommageable & pernicious.

cieuse, d'autant que par icelle la con-  
 tagion se tire au dedans du corps, &  
 vers le cœur, d'où il aduient que la  
 pluspart de ceulx qui sont fleuoto-  
 mes meurent comme par Hierome  
 Fracastorius souuerain & excellent  
 medecin, est tesmoigné en son liure  
 de la contagion, liure troysieme,  
 chapitre cinquieme, Lequel atte, c  
 tous ceulx qui en l'an 1505 & 1528  
 anne'es pestilentes, furent seigne'es,  
 moururent par la raison susditte, par  
 ce que où la semence interieure du  
 venin est esparse & meslee avec le  
 sang & humeurs du corps (ce que  
 se fait en l'espace de deux iours ou  
 environ apres que l'homme se sent  
 infect) la seignee y est grandement  
 nuisible par ce qu'elle fait agitation  
 au sang, augmenté par ce moyen la  
 putrefaction, & par telle agitation  
 & mouuement la contagion interieu-  
 re se mesle plus avec les humeurs, &



les rend de sincerés & purs, souillez  
& infectz : tout ny plus ny moins  
que si l'on esmeut vne fange puante,  
elle euapore plustost & rend l'air in-  
fect & puant, comme se voit par ex-  
perience : ou quand l'on esbranle vn  
vaisseau plein d'eau salee ou amere,  
l'eau se rend plus amere ou salee que  
si l'on le laisse en repos, sans l'esmu-  
oir. Car toute matiere esmue est pi-  
re que icelle qui demeure en surcean-  
ce comme tesmoigne Galien liure  
cinquieme de Symptomatum causis.  
Et par ces raisons ledit Fracastorius  
et Fernel aussi hommes tresexcellés  
sont d'avis ne fleuoromer en tel cas :  
ausquelz ie m'accorde, comme en  
mon ceuvre des lieux Communs de  
la medecine chapitre second de l'ap-  
pendice ( qui est intitulé Des mala-  
dies contagieuses ) j'ay amplement  
escriit. Et quant à moy en verité ie  
trouue meilleur & plus expedient au

*Lib. 3. de  
abditis re-  
rum cau-  
cap. 12.*

lieu de la feignee les ventoufes avec  
 fcarification, & de puyſ que le ſecôd  
 iour eſt paſſé ne doibuent aucune-  
 ment eſtre ſieuotomes. Voila le rei-  
 glement quant à la ſaignee.

## DE LA PURGATION.

**Q**uant à la purgation elle ſe  
 doit adminiſtrer du commen-  
 cement, mais avec medicamentz  
 begnins pluſtoſt que violés pour ne  
 debiliter la vertu, & en iceulx l'on  
 doit meſſer touſiours quelque poul-  
 dre comme la pouldre de l'electuaire  
 theriacal de Guidon, ou pouldre de  
 bohiarmeni avec de graine de gene-  
 ure, ou pour les riches de terre ſigil-  
 lee, ou de la theriaque ou metridat  
 bons. Donc ſi le patient eſt pouure  
 tu luy donneras demye once de Ele-  
 ctuaire de fuc de roſes, ou autant de  
 diaprunis ſolutif, ou vne once de

Catho

*BeZear-  
 Etique co  
 tre Venin.*

Catholicon, s'il est colericque. Et s'il est flegmatique luy donneras du Diacarthamitroy's drachmes ou de l'electuaire de citron autant. Et s'il est melancolique la confection hamec, le tout destrempé en eau d'escabieuse, d'aygrette ou buglosse, avec vne once de sirop de limons & vne drachme de bonne theriaque ou de la pouldre de boliarmeni preparé, ou de la semence de citron ou graine de geneure. Les riches serot purgés avec manne, reubarbe, sirop rosat laxatif, sans scammonée, Cassie, & mirabolans: Et si le cas le requiert, si pourra mesler en petite dose de l'electuaire de suc de roses, ou diaprimis solutif aux coleres, comme aux Phlegmaticques, vn peu de diaphenicon, & aux melancoliques de confection hamec, meslant avec lesdittes potions pour les riches, demye ou vne drachme de terre sigil

lee, de la bonne de Leuant, ou de la  
pouldre de diamargaritō, ou de celle  
teriacalle de Guidon, avec les eaux  
fufdittes, & firop de limons, ou de  
laygre du Citron. Et s'ilz ayment  
mieulx estre purgez par pillules, pré-  
dront des pillules communes de Ruf-  
fus, faites d'aloës, myrrhe, & saf-  
fran, y adioustant vn peu de Reu-  
barbe pour les riches: ou d'agarie  
avec vn peu de terre figillee ou bo-  
liarment préparé. Les pouures pren-  
dront pillules aggregatiues ou au-  
rees, ou cochies, vne drachme ou  
quatre scrupules. Et faite l'opera-  
tion prendront demye escuelle de  
bon bouillon de chapon, & se disne-  
ront legerement. Et durant l'opera-  
tion de la medecine tiendront tou-  
siours aupres soy bonnes senteurs  
de roses, oranges, limons, nerte-  
marioline, romarin, & semblables,  
& se laueront souuent le visage &  
nez

nez d'eau rose meslée avec vinaigre rosat, & pouldre de girofle, ou de angelique, ou zedoare, comme dit à esté dessus. Voilà l'ordre de la purgation.

## POTIONS CONTRE peste.

ET pour accomplissement de ce chapitre reste ordonner les potions nécessaires à donner au malade, pour résister au venin, lesquelles durant sa maladie fault que luy soyent souvent exhibées, iusques à ce que la nature ayt surmonté la force du venin, aydec de la vertu de la chaleur naturelle & des medicamēs bezeartiques, c'est à dire du tout contraires au venin pestilential. Ce que res Arabes en leur langue accoustument nōmer Bezoard, & les Latins Antidotum. Dōc matin & soir, & aussi, si besoing est, sur l'emdy ou la minuyct,

si les accidens sont violens, tu feras  
boyre au patient les potions suyuan-  
tes. Si le patient est pouure, prens  
bayes de geneure boliarmenici pre-  
paré, de chacun vne drachme, meslé  
le tout bien & puluerisé avec eau  
d'escabieuse, de buglose, ou aygre-  
te: & vne once de sirop de limons  
faiz luy prendre matin & soir tous  
les iours, ou bien prens pouldre de  
l'electuaire de Guidon vne drachme,  
& donne luy en mesme façon. Pour-  
ras aussi vser par grande efficace de  
la pouldre de betoyne desseichee, &  
subtilement puluerisée en la quanti-  
té d'une drachme ou quatre scrupu-  
les, prise avec eau rose en Esté, &  
en Hyuer avec bon vin blanc: & fait  
merueilleux effect, si le patient se tient  
bien couuert, & qu'il puisse suer, car  
elle fait euaporer par sueur le venin.  
La theriaque & metridat aussi sont  
louuerains à tel effect, pris en dose  
d'une

d'une drachme, avec eau rose en Efté,  
ou de cichoree ou aygrette, & l'Hy-  
ner avec bon vin blanc ou claret.

Pour les riches soit dispensee ceste  
poudre: Prenez racine de tormen-  
tille, racine de diptame Cretense, s'il  
est possible, racine d'angelique, de  
zedoaire, & de Gentiane, vne  
drachme: semence de citron & d'o-  
seille mondée, deux drachmes, bo-  
liarmeni préparé deux drachmes, ra-  
clure d'yuoire, vne drachme, betoy-  
ne deséchée vne drachme, & terre si-  
gillée de la bonne trois drachmes,  
perles puluerisées deux drachmes,  
corail rouge quatre scrupulles, escor-  
ce de citron ou orange seiche vne  
drachme, soit du tout faite poudre  
fort subtile, de laquelle en tel cas do-  
neras au patient avec les eaux susdit-  
tes le poix d'une drachme ou vne &  
demye, & si tu en veulx faire opiate,  
reduyras la dite poudre avec conser

ue de roses & de buglosse, & sirop de limons, & en feras oppiate de laquelle en donneras demye once chacune fois au patient. Ceste pouldre est vne des plus excellentes, & de grand effect, si elle est bien dispensee, qui puisse estre entre tous les remedes appropriés, comme par la vertu des ingredientz peult estre cogneu des doctes & bien expertz medecins en Part. L'eau distillee en baing Ma-

*Eau de  
merueil-  
leuse & ver-  
teu.*

rie, telle qui s'ensuyt, est de merueilleuse vertu contre la peste, si d'icelle le malade en prend vne once & demye, ou deux incontinent qu'il se sent frappe, la continuant deux fois le jour, mais la fault tenir preparee, & est vn des plus beau secretz de Part. Prenez de l'herbe du Ganchet, de la melisse, de la betoyne, & du vray scordeon, de chacun vne ou deux poignées: soyent tranchees assez menuement, & mises tramber

dans



dans de bon vinaigre rosat blanc,  
pour l'espace de deux iours & deux  
nuictz , y adioustant racine de tor-  
mentille rouge & pondereuse , raci-  
ne de diptam , & de gentiane , & an-  
gelicque, de chacune troys onces: bol  
d'armenie prepare , deux onces , se-  
mence de citron mondée , semence  
d'oseille de chacun vne once , graine  
de genieure vne once & demye , ma-  
cis & canelle fine de chacun demye  
once , le tout maceré par deux iours  
dans ledict vinaigre , soit distilé en  
alenbic de verre au baing marie , à  
feu lent & clair , & sortira vne eau  
merueilleuse & de grand effect & ex-  
perience , comme cehuy qui de sa  
grace m'en a fait participant , hom-  
me docte & experimenté en l'art, m'a  
tesmoigné auoir veu par effectz chos-  
ses admirables en la peste qui fut en  
Italie & Allemaigne l'an 1528.  
& 1553. Laquelle fut composee par

vn ſauant Allemant, qui en guerif-  
ſoit innumerables, pourueu que le ve-  
nin, n'eust procedé plus de vingt &  
quatre heures. Ce qu'en verité ſe  
peult croire par la vertu des ingre-  
dientz qui ſont excellents contre la  
peſte & tout venin. Et ſi laditte cau-  
ſe diſtille pour quelque grand prince  
ou ſeigneur puiffant, l'on y doibt ad-  
iouſter troys onces de terre ſigillee,  
demye once de perles en pouldre, ra-  
clure d'yuoire & de Corail. Ce ſont  
les remedes en potions plus aſſeurés  
& plus expertz & louables, que ie me  
ſuis peu aduiſer, laiſſant les ſperſtieu-  
ſes & vaines opinions de la corne de  
la licor, de laquelle le vulgaire fait ſi  
grand cas. Car à la verité c'eſt vne im-  
poſture de croire que les piéces que  
pluſieurs ont de telle corne ſoit d'i-  
celle beſte que les Grecz ont appelle  
Monoceros, & les Latins vnicornu,  
comme les idiotz Alicor. Car c'eſt vn

animal si rare à voir, & en lieux si estranges, qu'à peine Alexandre le grand en peult voir vn à tresgrandz frais & despens, & comme Plinæ Aelian, & Philostrate tesmoignent, ne se peult prendre viue habitant en lieux desertz & solitaires, aux extremes parties des Indes en Orient. Or ces choses laysees, retournantz à nostre propos, ie dis qu'il se fault fier aux medicamentz experimenrés, cōme ceulx que par cy deuant j'ay amené fidellement à l'vtilité du public & pour l'amour que nous deuons auoir à nostre prochain. Lequel propos cōtinuant, ie dis de l'autorité de Galien que le bol d'armenie est par luy singulierement recommandé entre tous les simples pour la peste. Car en la grande pestilence qu'en Grece pour lors estoit, tous ceulx qui prindrent le breuaige du bol d'Armenie furent soudain gueris, comme le mesme

Gali

*Lib. 9. de  
simpl. fa.  
ca. 10. V. J.*

Galien tesmoigne lequel dit qu'il le fault prendre avec de bon vin blanc vn peu trépé d'eau: la quantité doit estre vne ou deux drachmes. Et fault icy noter qu'aux malades ia at- taintz est necessaire donner plus grād dose des medicamentz bezeartiques contre la peste & plus souuēt qu'aux sains pour eulx preseruer. Car atten- du que le venin pestilential est ia en- clos dans le corps, sil a besoing de plus puissant remede pour le vaincre & surmonter qu'au parauant qu'il ayt saisy le corps. Et pour ce si aux sains pour preseruation tu en don- nes vne drachme, il en fault dōner le double aux malades. Ce qui seruira d'aduertissement aux vulgaires pour s'en seruir à conduyre leurs malades en faulte de medecin, lesquelz ne vi- sitent point telz malades.

*Ceste*

Ceste eau que s'ensuyt est aussi de grã-  
de vertu & efficace & bien ap-  
prouuee.

**P**renez du ius de limon deux li-  
ures, vinaigre rosat deux liures,  
boliarmeni preparé, deux onces:  
escorce d'orange seiche vne once:  
laissez le tout tremper vn iour na-  
turel audict vinaigre, & puis le fai-  
tes distiller au baing Marie, & d'icel-  
le eau en donnerez quatre onces, ou  
seule, ou avec sirop de limons, ou  
sirop de suc d'aigrette, & est fort ap-  
proprice: comme tesmoigne Fraca-  
storius en son troisieme liure des ma-  
ladies contagieuses, chapitre septie-  
me: affin que ie confesse par qui les  
remedes sont inuentés, & ne fraude  
nul de la louenge à luy deuë. Or  
des remedes interieuremēt pris nous  
en auons dit a souffisance. Reste à di-  
re de ceux qui exterieurement se doi-  
uent.

uent appliquer pour conforter le cœur. Mais au parauant que d'iceulx ie parle, ie descriray icy vn condit ou restourant pour donner au malade ayant siebure pestilentielle, Prenez conserue de roses, conserue de Nenufar, conserue d'aygrette, & de buglose, de chacune vne once: pouldre de perles vne drachme, boliarmeni préparé quatre scrupulles, sucre fin ce qu'il en fera besoing, reduis le tout en forme de condit avec fucilles d'or pour les riches. Et pour les pouures, souffira donner les conserues susdites avec vn peu de la pouldre de boliarmeni, ou de triasendali du simple ou semence d'aygrette, & de citron mondee, de l'escorce. Aussi est bon leur donner souuent vne tablette de diamargariton, quand ilz ont defailliment de cœur, avec vn peu d'eau de buglosse ou vn peu de vin blanc. Et s'ilz tombent en sincopes est bon  
leur

leur donner de la confection de Al-  
chermes de mesme: car elle est in-  
uicilleuse pour corroborer la vertu  
amortye, & la remettre sus. Et en cecas  
le restorer avec bon bouillons, &  
avec la menestre des œufz, & du vin  
appellée sambaiou, de laquelle auons  
parlé par cy deuant au chapitre huy-  
tieme. Aussi le mannis christi perlé à  
cest effect est conuenable & plaisant  
au goust duquel avec les bouillons,  
ou eau de buglosse s'en peult donner  
vne tablette ou deux. Pour confort-  
ter le cœur exterieurement faites l'E-  
pitheme qui s'ensuyt, pour les riches  
prenez eau rose, eau de nerthe, eau nas-  
se, eau d'aygrette, & de buglosse, &  
melisse, de chacun quatre onces, bon  
vin blanc ou maluoysie troys onces,  
pouldre de diamargariton & de gemi-  
nis, de chacune vne drachme: poul-  
dre d'escarlata qu'on appelle vermeillón  
girosle, de chacun demye drachme,  
poul

*Epitheme  
pour le  
cœur.*

pouldre de zedoaire & de boliarmeni, de chacun vn scrupule, trociques de camphre, demy scrupule. soit fait epit<sup>hème</sup> pour le cœur, lequel s'appliquera avec vne piece d'escarlata fine sur la region du cœur matin & soir. Pour les pourceux suffit faire epitheme d'eau d'aygrette, melisse, & eau rose, avec vn peu de vin blanc & pouldre de sandaulx, & vn peu de graine de genieure en pouldre. Au lieu desditz Epithemes se peuuent faire sachetz de taffetas rouge sur le cœur en ceste façon, & bien trapointez. Prenez roses rouges seiches, fleur de violetes, de nenufar, & de buglosse, de chacun vne poignée: fleur de romarin & d'orangier, si l'on est en lieu d'en pouuoir recouurer de chacun vne poignée, pouldre d'escarlata, girofle, sandaulx, pouldre de diamargariton, de chacun vne drachme: semence de citrô-  
bol



bol d'armenie, de chacun quatre scrupules: zedoare vne drachme, musc & ambre, de chacū cinq grains, le tout bien puluerisé, & mis entre du coton & du taffetas rouge, soit fait sachet, lequel sera arrousé legierement d'eau rose & vn peu de vin blanc, & appliqué sur le cœur.

*Epitheme pour le foye.*

**P**renez eau d'endiue, de cichoree, d'aygrette, & eau rose d'absinte. de chacune troys onces, bon vinaigre rosat blanc troys cuillers d'argent, pouldre de sandaulx vne drachme, semence d'aygrette deux scrupules, spicenardi vn scrupulle, soit fait Epitheme pour les pourceux. Et pour les riches pourras y adiouter pouldre de diamargarito, perles: corail, & zedoare de chacun demye drachme. Vnction merueilleuse &

de tresgrande vertu pour obuier à l'operation du venin aux malades de peste, tesmoignée par Matthiolus de Siene souuerain medecin de nostre aage, principalement en matiere de simples, en ses Commentaires sur Dioscorides, liure sixieme, sur la preface de Dioscorides audict sixieme liure. La description est longue & difficile à faire, & n'est que pour princes & grans seigneurs, estât de fort grand despée. Et pour ce pour euiter prolixité, nous remetrôs le lecteur audict lieu pour, si bô luy semble, la faire dispenser. Et se nô me huyle de Scorpions, lequel en verité est de merueilleuse vertu à rechaïsser toute poyson & venin, comme par la merueilleuse composition & artifice d'iceluy huyle se peut voir. Mais au lieu d'iceluy nous prendrons l'autre composition plus facile dudit huyle de Scorpions, escri-

pte par Alexāder Benedictus en son liure de peste chapitre vingtiesme, duquel la discription s'ensuyt: Prenez huyle d'oliue le plus vieulx que se pourra trouuer vne liure, prenez soixante scorpions vifz, & les mettez en fiolle de verre dedans ledict huyle, faisant boullir le dictz Scorpions dans ledict huyle l'espace de neuf heures à petit feu lent; ou bien mettre ledict huyle en sa fiolle au baing Marie, & quand ilz auront ain si bouilly dedans ledict huyle, y ad iousterez de bonne theriaque deux onces: & la ferez boullir dans ledict huyle vn quart d'heure, & puis colle rez le tout, & tiendrez ledict huyle en sa fiolle bien estouppé & serree avec cire & parchemin, & d'iceluy l'on en oindras le malade soubz les aysselles, dernier les oreilles, & aux aines poytrine, & aux poulx des bras & des temples, & le nez, deux ou

troys foys le iour. C'est vn remede  
tressingulier & de grande efficace,  
comme les susdictz autheurs tesmoi-  
gnent disantz que si telle vnction est  
appliquee soudain au malade de pe-  
ste, au parauant vingt quatre heures,  
qu'il sera deliuré, vsant des remedes  
cy deuant ditz. aussi le mesme au-  
teur escript ceste autre vnction e-  
stre de grand effect. Prenez huyle  
vieux vne fiole de verre de capacité  
d'une pinte & demye, dans lequel  
huyle vous mettrez de fleur de sam-  
buc six poignes, fleur du petit sam-  
buc qu'on appelle Ebulus en Latin  
& en François Hieble, deux poi-  
gnes, fucilles & fleur de mille-per-  
tuys, qu'on appelle hypericon, vne  
poignée: le tout soit mis dans ledict  
huyle: que l'huyle surpasse les her-  
bes, & le vaisseau bien estouppé soit  
mis au soleil ardent par l'espace de  
quarante iours, ou tout l'esté, & soit

reserué aux vsages susditz pour en oindre le malade comme dist. est. Or apres l'auoir oint, le fauldra couvrir: car tel huyle prouoque fort la sueur: & par telle euacuation fait euaporer le venin dehors. Et si audit huyle l'oy adioustoit vingt ou trete scorpiôs, seroit beaucoup plus excellent, mesmes y mettant troys onces ou deux de bonne theriaque, & le faire boullir au baing marie, seroit de fort grande efficace. Voyla les meilleurs remedes exterieurs desquelz fault vsfer en ceste estrange maladie.

**COMME L'ON DOIBT**  
*proceder à la cure du bubon pesti-*  
*lentiel, CHAP. XIII.*

**L**E bubon quand il apparoit en aucun des monctiores c'est signe que la nature par sa force a voulu descharger le mem-  
 bre

bre principal du venin le molestant,  
& par ce nature par sa prouiden ce a  
produyt au cœur, cerueau, & foye  
certaines parties glanduleuses & spō  
gieuses aptes à receuoir les superflui  
tés nuysantes à icelles parties. Car  
au dessouz des ayscelles y a des glan  
des seruantz au cœur, & font ycelles  
l'émonctoyre de ce membre, comme  
aupres des oreilles aussi en y a de pa  
reilles, seruantz pour descharger le  
cerueau, & aux aines pour le foye.  
Et quand le venin enuahit aucun de  
ses membres principaulx, nature  
pour garantir la partie noble, des  
charge le venin à son émonctoyre  
propre. Parquoy si le cœur est atta  
qué de venin, le bubon s'apparoi  
stra soubz les ayscelles; & si le cerueau  
est blessé, le bubon se monstrera  
soubz les oreilles, comme aussi le  
foye estant endommagé, le bubon  
sortira aux aines. Et par ce que c'est  
vne

vne expulsion de nature faite aux  
 parties exterieures & viles, pour ga-  
 rantir les interieures & principales, il  
 se fault soigneusement garder de ne  
 le repercuter au dedans, par medica-  
 mens froidz, repercusifz, ou adstrin-  
 gens: ains d'autant que tel bubon  
 est de matiere veneneuse, doibt estre  
 euocqué & attiré au dehors par me-  
 dicamentz attractifz, chauldz &  
 suppuratifz tant qu'il est possible.  
 Donc apparoisant la tumeur en au-  
 cun desditz emoctoyres, tu y appli-  
 queras soudain des incisions tout à  
 l'entour par maniere de scarification  
 faicte auéc rasoir, pour vuyder le  
 sang envenimé. Qui est là autour &  
 dedans le bubon, & y appliqueras  
 soudain vne ventouse, pour attirer  
 à soy le venin, si le lieu est capable de  
 supporter ventouse, comme aux ai-  
 nes est bien commodé ce faire, & der-  
 riere les oreilles, mais non soubz les

aiscelles, ou bien malaisément. En  
 en après applicqueras médicaments  
 suppuratifz & attractifz en la forme  
 suyuanté. Prends vn oignon blanc, &  
 le cure par dedans avec le cousteau, y  
 faytant vne concavité assez grande,  
 laquelle rempliras de fort bonne  
 theriaque, ou de la pouldre theria-  
 cale de Guidon, & le couuriras de son  
 couuercle, & feras cuire soubz la  
 brase iusques à ce qu'il soit mol: &  
 tout chaud l'appliqueras sur le bu-  
 bon. C'est vn des meilleurs remedes  
 que l'on y sçache appliquer. Ou près  
 de l'herbe de scabieuse pillee entre  
 deux pierres bien nettes, & l'appli-  
 que sur le bubon. Ou seule, ou me-  
 sée avec de graisse de porc vieille &  
 salee. Tu feras aussi le Cataplasme  
 suyuant fort bon à cela: Prends racines  
 de lis blancz, bien nettoyers, demye  
 poignée, fueilles & racines de mal-  
 ues & de malues blanches, qu'on ap-



pelle althea, deux poignées, figues  
 seiches xxx. en nombre, graine de  
 lin & de fenigrec demye once de cha-  
 cun, leuain vne once, son gros,  
 demye poignée, scabieuse demye  
 poignée, fais le tout boullir en eau,  
 piller & passer, y adioustant apres fa-  
 rine de froment, farine de lin, & de  
 fenigrec, de chacune vne once boul-  
 lies au preallable avec vn peu d'eau,  
 & de miel, galbanum deux dra-  
 chmes, armoniac vne drachme,  
 moieux d'œufz deux en nombre, sel  
 commun vne drachme huyle de lis  
 blanc tant qu'il sera necessaire, gres-  
 se de geline vne once, safran vne  
 drachme soit fait cataplasme, & ap-  
 plique sus le bubon avec laine grasse,  
 le remuant deux ou troys foys le  
 iour. Aussi cestuy cy est fort bon.  
 Prends miette de pain blanc, demye  
 liure figues grasses xxx. en nombre,  
 leuain deux onces, limacés viues  
 avec

avec leur coquille xx. en nôbre, grain  
 de fenigrec vne once, soit le tout  
 cuyt ensemble en eau: puis pile le  
 tout, & y adioustes gresse de porc sa-  
 lee vne once, huyle de lis blanc, ce  
 que besoing sera soit fait cataplasme  
 lequel à cest effect pour maturer &  
 ayder à rompre l'apostume est fort  
 bon. Les anciens vsent de l'empla-  
 stre de Diachylon magnum, & met-  
 tent dessus le bubon ce que i'ay ap-  
 prouué. Car il est bien attractif, à cau-  
 se des gommés qu'y entrent, & si est  
 suppuratif. Aussi est fort loué pour  
 attirer le venin du bubon auoir vne  
 poulaille ou vn coq, & luy plumer le  
 cul, & le tenir bien pressé sur le bu-  
 bon, en serrant le bec du coq, qu'il  
 ne puisse respirer que par le cul, car  
 par ceste façon, il attire le venin du  
 bubon: & quant iceluy sera mort,  
 en mettre vn autre. Et au lieu de ce  
 remede l'on prend de gros pouletz

ou pigeons & estans fendus le long  
 du dos, tous chauldz l'on les appli-  
 que sus le bubon ou charbon: car ce  
 remede est approprié à l'un & à l'aut-  
 re. Quand le bubon sera meur il  
 le fault ouurir avec cautere actuel,  
 qui est meilleur que la lancette ou fer  
 froit, d'autant qu'il conforte le mé-  
 bre, & extirpe le venin par la chaleur  
 actuelle & violence du feu. & mesmes  
 je conseille à tous les malades pesti-  
 ferés l'endurer ores qu'il leur face ef-  
 fray: car c'est le meilleur & plus salu-  
 taire remede que l'on leur sauroit  
 donner, comme par Albucasis &  
 Auicenne est tesmoigné, parlant de  
 la vertu du cautere actuel. Et en lieu  
 du cautere actuel, si les patiens ne le  
 veulent endurer, y fauldra proceder  
 par ruptoires familiers, de quelz le  
 meilleur est celuy qui est fait de cen-  
 dre & de chaulx vive, boullis en sem-  
 ble iusques à la consommation de l'eau,

&amp;

& qu'il n'y demeure rien que la cédre & chaulx incorporez & vniz ensemble: qui est vn fort, excellent ruptoire, & qui fait son operation sans aucune ou bien petite douleur, comme mille foys en plusieurs i'ay expérimenté. & notez qu'en ses bubons pestilentiels ne fault attendre l'entiere maturation, ains les fault ouuoir auant qu'ilz soyēt du tout meurs, afin que le venin ne s'arreste longuement dedans, faisant euaporation aux membres principaulx, & leur cōmuniquant la venenosité avec danger de mort. Et par ce est meilleur les ouuoir plustost que plus tard. Et quād ilz sont ouuertz n'y fault mettre tentes de lin qui soyent grosses, ains petites affin q̄ la sanie veneneuse puisse mieulx couler en bas, & ne se retenir dedans. Et sur ce point Alexāder Benedictus conseille en son liure de peste chap. xiiii n'y mettre point

point de tentes de lin ny autres drap  
peaulx, pour ne retenir le venin : &  
en effect la raison est tresbonne. Et  
aussi ne vult que l'on ferre par trop  
ledict bubon ouuert, ains c'est assez  
que seulement l'on y puisse tenir des  
sus l'appareil. Et quant à moy en ve-  
rité ie m'asseure qu'il est beaucoup  
meilleur y mettre tentes canulees  
d'argent, plomb, ou estaing, que  
non toutes fermes de lin, afin que  
par les tentes canulees, le venin se  
puisse mieulx & plustost euacuer,  
sans estre retenu dedans : qui est l'in-  
tention que doibt auoir le bien auisé  
& docte chirurgien. Ce que seruira  
d'auis & conseil dorennauant com-  
bien que plusieurs trouueront cecy  
estrange à leur opinion, estans cou-  
stumiers en vser d'autre façon : mais  
la verité en toutes choses doibt te-  
nir l'ieu, & n'estre point deguisee.  
Après que le bubon est ouuert il le  
fault

fault mondifier avec medicamēs ab-  
 ſterſifz comme s'eſuyt. Et note qu'il  
 fault longuement tenir ces bubōs ou  
 uertz & les laiſſer bien purger de  
 leur ſanie veneneuſe, par l'vſage des  
 mōdificatifz enſuiuātz, Prēs du mō-  
 dificatif de Refina, & le mets ſur les-  
 dictz bubōs au dedās avec les têtes  
 canulees ou, Prēs farine d'orge cuyte  
 en eau & miel vne once ou deux, deſ-  
 faiētz avec bō miel roſat coulé y ad-  
 iouſtāt racine de iris Florentin & vn  
 petit de ſel: ſoit faiēt oīgnemet mon-  
 dificatif. ou, Prēs ſarco colle bien pul-  
 uerifée, miel cuyt, autāt de l'vn com-  
 me de l'autre: incorpore eſemble, &  
 faitz oīgnemet. car il eſt mōdificatif.  
 Mais entre tous les autres vnguentz  
 mōdificatifz d'vlcères puants, vene-  
 neus, & de mauuiſe mōrigratiō, ie  
 n'ay point trouué vn plus excellent  
 ny plus abſterſif de ſanie virulente,  
 puāte & mauuiſe que ceſtay cy par  
 moy compoſé & ſouuent avec bon

effect expérimenté : Prenez iris de  
hache & de absinte de chacun  
quatre onces, miel rosat coulé, huiet  
onces, boullies ensemble iusqu'à la  
consumption des sucz, puis adiou-  
stez terebinthine de Venize lauee  
avec eau de vie, quatre onces, racine  
de iris Florétin & d'aristoloche ron-  
de, de chacun trois drachmes, fari-  
ne de lupins, deux drachmes soit  
fait oignement. En verité vous puis  
asseurer auoir veu faire merueilleux  
effectz à tel oignement es vicerres du  
mal de Naples, & autres malignes &  
fait grande & belle absterfion, non  
seulement de sanie grosse & mauuai-  
se, ains de chair morte & carniuas  
enclos en telles maladies & vicerres,  
comme souuent ay expérimenté, ou  
faites ainsi : Prenez terebinthine de  
Venize lauee en eau de vie l'hyuer, &  
en eau d'orge l'esté, demye liure, huy-  
le rosat troys onces, miel rosat qua-  
tre onces, myrrhe bonne & gom-

meuse & odoriferante, aloës, mastic, aristologie ronde de chacun vne drachme & demye, farine d'orge troys drachmes, soit fait oignement pour t'en seruir à mondifier telles vlceres. Car il est fort bon. Voila l'ordre des oignements mondificatifz. Apres que l'ulcere est bien mondifiee par long espace de temps il la fault conglutiner avec emplastre Dyachalcytheos, ou emplastre de ceruse ou emplastre rouge desiccatif ou ruthie: mais le meilleur est cestuy cy. Prends betoyne, centauree mineur, agrimone, aristologie ronde de chacun vne once, poix commune demye once, graisse de bouc demye once, mastic troys drachmes, aloës demye once, cire neuue deux onces, les herbes cuyras en bon vin rouge & puis les couleras adioustant la poix, la cire & graisse, & recuyre le tout, & en fin y adiouster l'aloës &



mastic & soit fait emplastre incarnatif & bon. Et note que si le bubon est fort douloureux il fault mitiguer la doulueur avecq̃ le cataplasme de mica panis boullie en laiēt, & puis avec moyeux d'œufz, saffran & huyle rosat appliquer dessus le bubon douloureux. Ou fomentier le lieu avec decoction de malues & guymalues, fleur de camomille & melilot, & son, & le tout cuyt en eau en faire fomentation au lieu de la doulueur. Voila la cure du bubon pestil'entiel ou boce. s'ensuyt celle du charbō pestil'entiel.

D E L A C V R E

du charbon pestil'entiel,

CHAP. XIII.



LE charbō est pustulle maligne prouenant de sang fort chaud & gros en substance, lequel fait par son adustion

au cuyr vlcere avec eschare ou  
crouste, eleuât avec inflammation les  
parties prochaines, causant grande  
douleur. Ce que par Galien liure  
second à Glancon chapitre fixième  
a esté trèsbien deduyt. Et d'iceux  
ores, que toute espeece de charbon  
soit maligne & perilleuse, comme  
tesmoigne le mesme auteur au Cõ-  
mentaire troysième sur le troysié-  
me liure des Epidimies d'Hippo-  
crates, aphorisme x i i. Ce neant-  
moins ceux qui n'ont avec soy ve-  
nenosité contagieuse & pestilentielle  
meslee, ne sont si dâgereux de mort  
comme ceux qui regnent en temps  
de peste pour la venenosité intro-  
duyte aux humeurs & masse san-  
guinaire infectee de là mauuaise  
qualité de l'air qui rend telles pu-  
silles oultre leur naturelle malice  
pl<sup>us</sup> malignes & perilleuses de mort,  
avec grandz & mortelz accidēs. Et

par ce en telles pustulles est neces-  
 faire y auoir grand soing & diligen-  
 ce à les curer promptement, & ex-  
 tirper & estaindre leur venenosité  
 au plustost qu'il est possible. Ce  
 q par le moyen cy escript se pourra  
 methodiquement aecomplir. Done  
 quand le charbon s'apparoistra en *Cure du*  
 quelque part de la personne, le plus *charbon*  
 souverain remede c'est par feu a- *pestilenti-*  
 ctue l'appliqué sur la pustulle tarir *iel.*  
 le venin, car n'y a rien que plustost  
 mortifie & esteigne le venin que le  
 feu, ou medicamés caustiques, ayantz  
 vertu de feu. Et par ce le cautere a-  
 ctuel appliqué sur la pustulle, est le  
 souverain remede d'icelle. Mais  
 plusieurs malades craintifz ne veu-  
 lent ce permettre, au lieu duquel  
 appliqueras sur le charbon les re-  
 medes suyuantz ayantz vertu cau-  
 stique. Prenez vne noix vieille, ou  
 deux, farine d'orge, raisins de pāse,

sans le grignon, figues grasses seiches, de chacun vne once. Soit le tout bien pilé au mortier, & puis cuyt en vin & huyle de pauot: soit fait vn vnguët leq̃l appliqueras sur le charbon: car il mortifie le venin, ayde à putrefier la mauuaise chair. Aussi prens deux moyeufz d'œufz ou troys, poiure vne drachme, sel commun vne drachme & demye, suye de la cheminee ou du four, demye drachme: soit tout mellé & faict vnguent. ou cestuy cy, Prens fucilles de rue demye poignée, figues grasses six en nombre, poyure vne drachme, suye de la cheminee ou du four demye once, deux moyculx d'œufz, saffran demye drachme, graisse de geline fresche sans sel vne once, avec ius d'escabieuse, soit fait vnguët: lequel est merueilleux. Car il garde que le venin ne procede plus oultre, & ouure bien tost le  
char

charbon, & fait bonne eschare. ou  
fais ainsi, Près figues grasses demye  
liure, graine de moustarde troys  
onces, huyle de lis blancz ce qu'il en  
faudra pour incorporer. Soit fait  
emplastre, & appliqué sur le char-  
bon. L'vnguent appellé basilicon  
mellé avec demye once de bonne  
theriaque, ou mitridat, & suc d'escabi-  
euse est merueilleusement bon &  
approprié, si comme vn moyeu  
d'œuf avec du sel incorporé & iust  
d'escabieuse, est singulier & le plus  
familier. Les simples medicamentz  
à tel effect appropriés, sont l'escabi-  
euse pillee entre deux pierres, &  
appliquée. Aussi l'herbe appelée  
Cauda equina, c'est à dire queue de  
cheual, qui est vne espeece de cōsou-  
de, & le verbasum appellé en vul-  
gaire du bouillon, ou tassus barba-  
tus, selon les apoticares mis dessus  
& appliqué est bon. Comme aussi

plusieurs de nos auteurs praticiens attribuent au saphir pierre precieuse, la vertu d'esteindre le venin du charbon, si l'on le touche plusieurs foys avec icelle pierre. Aussi le mitridat, ou theriaque y sont fort bós appliqués, & les noix rāces & vieilles meslees avec figues seiches. Et notez qu'incōtinēt que le charbon s'apparoist, est fort bon le scarifier tout à l'entour avec le rasoer, comme commāde Galien liure 14. de la metho. ou y appliquer des sangsues pour attirer dehors le sang venimeux. Ce sont les remedes qu'il faut appliquer incontinent sur le charbon. Mais à l'enuiron & parties circonuoisines du charbon, il faut appliquer medicamens repercusifz de peur que le venin ne surmonte & gaigne les parties circoniacentes: auquel effect l'onguent de bolo est le principal & plus commun appliqué

qué tout à l'entour. Car il conforte la partie, & repoulse le venin. Tu feras doncques ainsi: Prens huyle rosat troys onces, vinaigre rosat vne once, boliarmeni vne once & demye. Soit fait vnguent pour appliquer à l'entour du charbon. Ou ainsy, Prenez huyle rosat omphancin fait d'oliues vertes, vin de grenades, vne ou deux onces, boliarmeni & terre sigillee pour les riches, de chacun demye once, soit fait vnguent, & appliqué aux environs du charbon. Galien fait l'emplastre de plâtain & grenades avec leur escorce & gros pain, le tout bouilly en vin gros y adioustant des lentilles. ou, Prenez lentilles, miette de pain gros, son, & le tout cuietz avec vinaigre, & faites emplastre: cōme aussi ce mēme pourras faire des grenades aigrēs-douces, couppees en quartiers avec leur escorce,

& cuytes en vinaigre iusque à ce qu'ilz se deffacent, pile les, & applique à l'entour du charbon: ou bien cestuy cy, Prens huyle rosat tant qu'il en fait besoing: dissoudras en iceuy bol d'Armenie, sang de dragon, ou des galles puluerisees, & en feras oignemēt pour mettre à l'entour comme des autres. Aussi des aubins d'œufz batus avec vinaigre rosat & eau rose, & y tremper vn drappeau de linge dedās, & le mettre à l'entour du charbon. Voila les remedes pour prohiber que le venin du charbon ne se communique aux parties voy fines. Nous auōs dit des remedes qu'il faut appliquer tant dessus le charbon qu'aux parties d'enuiron, reste à dire des remedes pour tost rompre le charbon, qui sont telz: Prens oppopanax troys drachmes, figues grasses y ne once, ou autant de raisins de panse,



panse, du leuain demye once, melle tout ensemble bié pilé, & applique sur le charbon. La fiente de l'homme est à ce fort appropriée, mais par-ce que c'est vn remede sordide nous n'en tiendrons conte, si fait-il fort bon effect.

Prends moyeul d'œuf, vn peu de sel, & incorpore le tout avec ius d'escabieuse, & appliqué cōme dit est. Ou fais en ceste maniere, Prends leuain fort, vne once, herbe d'escabieuse & consolide maieur, de chacun vne once, raisins de panse sans le grignon demye once, cantharides six en nombre, fiente de moyneaulx troys drachmes. Incorpore tout avec huyle de lis blancz. aussi cestuy cy est bon: Prends figues grasses troys onces, de leuain deux onces, graine de moustarde, fucilles de rue, sel commun, racine d'aristolochie ronde, de chacun vne once &

denye: farine de froment & de fenugrec, de chacun vne once, miel communtant qu'il sera necessaire: mesle tout: & l'applique.

*Pour faire tumber l'eschare & chair morte du charbon;*

**P**renez burre fraiz, graisse de geline de chacun vne once, moyeu d'œuf fraiz meslés ensemble, & appliqués dessus, l'ô y peut adiouster de basilicon vne once. Item, Prenez racine de guymalues deux poignées, de buglosse vne poignée, cuytes en eau, & piles ensemble & passes par l'estamine, y adioustant farine de fenugrec & de lin, de chacune vne once, burre fraiz lauë en eau, graisse de porceau fraiche de chacun vne once: soit faict oignement. Ou prens racine de guymalues, de branche vrsine, de malue &

de l'herbe Robert, ditte bec de cigogne, de chacun vne poignée, soit tout cuyct en eau pilé & passé, meslé avec burre fraiz & graisse de geline, appliqué iusques au tomber de l'eschare. Rasis faisoit emplastre de miel & de sarcocolle autat d'une que d'autre, & appliquoit. Après l'eschare tombée faudra modifier l'ylcere avec vn des mondificatifz descriptz au chapitre dixième, & puis quand le charbon sera bien purgé de la sanie, & qu'il ne rendra plus rié, le fault incarner avec l'onguent qui s'ensuyt: Prends mastie bien gommeux, encens blanc, aristologie ronde, myrrhe, farine d'orobe, lytarge, ceruse, aloës, autant d'un que d'autre, suif de bouc, ce que besoing fera: huyle rosat bien peu, soit fait vnguent selon l'art, & soit appliqué iusques à entiere cicatrification. Et pource qu'en telz

char

charbons il s'y fait ordinairement  
difforme cicatrice après leur gueri-  
son : pour icelle reparer vseras des  
remedes suyuantz : Prens borras  
deux drachmes, cāfrevne drachme,  
corail blanc demye once, gomme  
dragant, amy dō, cristal, pierre ditte  
dentalis, encens blanc, sel commun  
de chacun troys drachmes, marbre  
blanc, deux drachmes, racine de lar  
rus vne once : la gomme dragāt soit  
pilee en mortier de marbre, & le re-  
ste puluerisé & criblé : après y ad-  
iousteras graisse de porc fort blan-  
che, suyf de cheureau, graisse de ge-  
line fresche, de chascun vne once &  
demye. Soit le tout liquifié en vase  
de plōb, & coulé par vn drappeau,  
& après y adiousteras les pouldres,  
excepté la Cāfre & le borras. Cuitz  
le tout à petit feu remuāt tousiours  
avec l'espatule : & quand commen-  
cera boullir, metz y la Camfre &  
estant

estant bien le tout incorporé, garde cest oignement en vase de plôb. Car il est de merueilleux effect.

Pour les pouures à celle mesme intention, tu prendras des petis formageons de chieure gras & fraiz, sans point de sel, comme ceux que l'on à accoustumé de faire en Prouence, meslé avec du bon miel, & vn peu de poudre de ceruse, & feras tresbon remede. Item prens graisse de porceau, nettoyée de ses peaux, & trempee en bon vinaigre par neuf iours, renouvelât de trois en trois iours le vinaigre: prens de ceste graisse de porc ainsi preparee, vne liure, faiz la bouillir en vin blâc bien peu, & coule après par vn linge, & l'incorpore dans vn mortier de marbre avec laiët de chieures ou eau de plantain, puis y adioust li-targe d'or, souffre vif, de chacun troys onces encens blanc vne once, argent

argēt vif amorty avec ius de limon,  
demie once, borrax deux drachmes,  
Camfre vne drachme, soit fait vn-  
guent.

Item prens chaux viue esteinte  
en eau tant que tu vouldras, soit la-  
uée par six foys en eau de plantain  
& eau de pluye, iusques à ce que  
toute l'acuité en soit offee, melle la  
avec huyle rosar, dās vn mortier de  
plomb la bien broyant: & auras  
bon oignement pour réparer les  
difformes cicatrices que laissent les  
charbons.

C'est l'entiere curation du char-  
bouclé pestilentiell.

## DE POURVOIR AUX

accidentz plus vrgens qui suruen-  
nent à la fièvre pestilentielle, boce,  
& charbon,

## CHAP. XV.



**L**E S plus molestes & dangereux accidens en ceste maladie sont foiblesse de vertu, de faillement de cœur, Syncôpe, resuerie ou frenesie, soif extreme, sommeil profond ou veille continue, spasme, froidur des extremités, ausquelz diuersement faut pouruoir selon la nature d'un chacun d'eux à la foiblesse de la vertu (ce q tu congnoistras par la debilité du poux, palleur de la face, & amortissement du patient) tu y pouruoiras confortât le malade par bons bouillons de chapon, pain laué, coulis, Sambaion descript dessus au chapi. 8. Aussi avec bon vin, comme commande Galien liure 12. de la methode; luy en baillât en petite quantité, & moyennemēt trépé, ou luy faire prendre vne rostie de pain avec sucre & canel

*A la foiblesse de vertu.*

canelle arrousee d'un peu de bon vin blanc ou claret. Tu luy donneras eleſtoire de Diamargariton, de Manus Christi avec perles, & entre tous les medicamentz propres à conforter la vertu c'est la cōfection de Alehermes descripte par Mesué, en son antidotaire, laquelle est de merueilleuse force & efficace pour restaurer la vertu tarie & à demy mortifiée par la maladie, cōme en plusieurs ay experimenté, donnee en quantité d'une drachme avec eau de buglosse, & vne petite cuillier de bon vin blanc ou claret. Et te puis asseurer (amy lecteur) sur la fidelité que ie doibs à mon Dieu, que pour restaurer la vertu amortie par la force de la maladie c'est vn souverain remede & admirable, comme en plusieurs de mes patiens ay de bonne foy souuēt experimenté, nommément en Arles

en



en la personne de noble Iean Meyran Seigneur du Baie, & en noble Alis d'Ayguiere, lesquelz sur la violence d'une fiebure aygue & maligne, ledict Seigneur Meyran par les accidentz de la grosse pierre qu'il auoit en la vessie & laditte Damoyse, par la malignité d'une fiebure continue, vindrent en estat de mort prochaine, ayantz perdu la parolle & congnoissance, & presque sans vertu vitale, congneue par l'extreme debilité du poulx, tellemēt que l'on attēdoit la mort prochaine, & avec l'ayde de Dieu qui met sa vertu aux medicamentz, ilz furent releuez d'estat mortel, & reuindrent avec l'ayde de Dieu en leur premiere santé: qui fut en verité à plusieurs chose admirable de les voir remis en estat de vie, estātz si prochains à la mort, comme de ce tous Messieurs d'Arles en peuuent estre bons tesmoings:

m. qui

qui ont veu par effect tout le narré.

Aussi sera bon conforter le patient, luy donner bon cœur avec parolles amiables, & le faire esuertuer, & luy oster toute crainte. Car cela viuifie fort la vertu & la remet au dessus.

*Au defaillement de cœur.*

Au defaillement de cœur que les Grecs nomment Lypothymie, faut pouruoir avec Electuaire de Diamargariton, ou de la poudre, y adioustant de la poudre de l'Electuaire de gemmis, & bien peu de la poudre de Diamusc du doux, & avec vn peu de bon vin blanc, & eau de buglosse ou escabieuse faire boire au malade, & la dose de la poudre est vne drachme ou quatre scrupules. Et en cest accident faut conforter le patient avec bonnes senteurs, comme luy faire froter les poux des bras, & des temples avec bon

bon vin, eau rose, eau nasse, vinaigre rosat ou avec la mixtion d'eau rose & nasse avec bon vinaigre rosat, & poudre de girofle & canelle. Et si le patient estoit constippé, & ores aussi qu'il ne le fut, ne sera que bon luy donner vn clystere pour diuertir les vapeurs qui ne mōtent au cœur. fait le clystere de la decoction de malues, bletes, borraches, mercurial, semence de melon, & vn peu d'anis, & du son, & y dissoudre vne once de Catholicon ou casse, huyle violat & gros sucre. Si le malade tōbe en syncope, donne luy soudain deux ou trois cuillers d'argent de bon vin pur, comme commande Galien au douzième de la methode. Et en tel cas est bon luy donner quatre grains de musc destrempé avec bō vin, & eau de buglosse, si la fièvre n'est par trop vehēte, ou en lieu de ce remede luy

donner le potus suyuant cy après.  
Prens girofle en pouldre demye  
drachme, pouldre de perles & de  
corail, de chacun demye drachme,  
faiz breuuage avec eau de buglosse  
& vn peu de bon vin blanc ou cla-  
ret. Et en tel accident faut crier au  
patient, le froter violement, luy  
faire sentir bonnes odeurs d'eau  
rose, de nasse avec vn peu de musc,  
& luy donner de la confection de  
Alchermes vne drachme, avec eau  
de buglosse & vn peu de vin, ou du  
ius de pōmes avec eau de buglosse,  
& demie drachme de perles pour  
les riches, & pour les pouures de  
poudre de girofle. Et s'il abonde en  
humeurs coleriques, les euacuer a-  
vec vn peu de Rhubarbe, ou de E-  
lectuaire, de suc de roses, ou sirop  
rosat laxatif sans scammonce. Aussi  
est bō luy getter d'eau fresche sou-  
dain sur le visage par violence: car  
cela

et la vieillesse l'esprit amorty. Voila  
les remedes pour la syncope. Si le  
patient tombe en resuerie, luy faut *Pour la*  
bailler prompte euacuation pour *resuerie.*  
diuertir les humeurs qui ne mon-  
tent au cerueau, faire frication des  
parties inferieures, & ligatures des  
extremités. Luy faire prendre sirop  
de pavot avec eau de decoction de  
laitue, porcellaine, ou aygrette, &  
luy lauer les iâbes & bras avec deco-  
ction tiede de fauilles de canes, de  
saule & de pāpine de vigne, de lai-  
tues, fleurs de roses, de nenufar, &  
camomille, & testes de pavot blanc;  
le tout bouilly en eau, & tenir le pa-  
tient en silence & lieu obscur, & le  
garder de parler le plus qu'il sera  
possible. Et si la resuerie est trop fu-  
rieuse, le lier, & luy oster toutes cho-  
ses qui le puissent endommager,  
comme toutes especes d'armes, &  
autres choses offensibles: au reste

luy procurer le sommeil & repos.

A la soif extreme qui presse le patient, faut remedier par boire amplement comme commandēt Paulus Aegineta & Auicenne, & le boire sera eau fresche en grande quantité, ou seule si le patient est ieune & fort, ou meslee avec sirop de limons, sirop d'aygrette, sirop Alexandrin, ou violat. Et notez qu'il faut que le boyre soit copieux & abundant pour estaindre l'ardeur de la fieure interieure qui les brule, car le boire en petite quantité leurs enflambe la fieure plustost que ne la rafraeschit. Et pource les mentionnés auteurs veulent que l'on donne en fieure pestilentielle largement à boire au patient. Car cela le prouoque ou à vomir, ou à suer, & si estaint l'ardeur de fieure.

Au sommeil profond on reme-

die

die par fortes frications des extre-  
mités; & crier souuent & à haute-  
voix au malade, le tenir en lieu clair  
& bien esuété, luy dōner ventouses  
sur la mucque avec scarificatiō, luy  
donner clysteres aygus faitz de de-  
coction de malues, bismalues, ble-  
tes, hyssoppe, betoyne, rue, & sau-  
ge, & centauree mineur, de cha-  
cun demie poignee : agaric deux  
drachmes, polypode vne once, col-  
locynthe vne drachme, son vne  
poignee, soit le tout bouilly en eau,  
& coulé : y adiousteras Catholi-  
con vne once, Electuaire Indc,  
ou hierepicre composee de Ga-  
lien, demie once, sel vne drachme,  
miel commun demie once, Soit  
fait clystere, lequel prendra au  
matin ou bien deuant souper du-  
rant le subeth, qui est le long  
& profond sommeil. Aussi est bon  
luy faire odorér de la poudre de

cheueux bruslez avec du vinaigre trempée, car cela esueille fort le patient. Et si au contraire le patient ne peut dormir, luy donneras du sirop de papauere à l'heure de son dormir deux onces, avec decoction de laitues & graine de pauot blanc, & luy oindras le front avec l'onguēt populeon, & vn peu de semence de pauot blanc & d'anet. Tu luy oindras aussi les narilles d'huyle de pauot, & violat avec vn grain d'opium, & de saffran autant incorporés ensemble, si la necessité le requiert, & non autrement.

*Pour le  
basme.*

Le spasme s'il suruient au patiēt, est signe mortel & peu en rechapent, selon l'aphorisme de Hippocras liure second, aphorisme 26. Ce neantmoins ne faut pour cela laisser le malade sans secours, & y sera pourueu par onctions faites à la nuque d'huyle violat & de lis blanchz  
y sur



y surmettant de l'aine grasse parfu-  
mee d'encens, benioin, & estorac,  
& tiendra en la bouche vne piece  
de noix muscade, & la machera sou-  
uent. Et luy donnera-on des clyste-  
res lenitifz, & non aiguz, & luy  
faire boire eau d'orge avec sirop  
violat & l'humecter avec bōs bouil-  
lōs: car tel spasme pour le plus sou-  
uent prouiet de inanition, & est or-  
dinairement mortel.

La froideur des extremités, en *A la froi-  
dure pestilentielle & toute autre* *deur des*  
*fièvre aiguë, denote foiblesse &* *extremi-*  
*ties.*  
mortificatiō de chaleur naturelle,  
& est signe totalement par le plus  
souuent mortel. Il faut en ce cas es-  
chauffer les extremités avec linges  
chauldz, & luy chauffer souuent les  
piedz & mains, & luy donner quel-  
que peu de vin pour viuifier la cha-  
leur naturelle mortifiée & abbatue,  
luy faire tenir vn clou de griosse à

la bouche, luy donner de la poudre de Diacameron ou de Diamusc: le tenir chaudement dans le liét, & cōtregarder que vent ou froid aucunemēt ne le touche. Mais quād le pouure patient est venu iusques là, il y a pouure espoir de luy; comme tesmoigne Hippocras liure quatrième des aphorismes, aphorisme XLV. I. I. I. car c'est vn signe de mort prochaine.

**DE L'ORDRE ET REGIME**  
*que doibuent observer*  
*ceux qui assistent aux*  
*malades de peste*  
*pour le servir,*

### CHAP. XVI.



**L** est chose euidente que ceux qui habitēt cōtinuellement avec les infectz de peste

peste sont en grand danger de recevoir la mesme infection de leurs malades, pour hanter avec eux nuit & iour, recevoir leur balaine, sentir leurs puantises, & attirer l'air infecté des maisons infectes de leurs maladies: qui est chose fort dangereuse, comme bien la dit Galien premier liure des differences des fieures, chapitre second. Parquoy ceux qui ont fait deliberation se tenir avec les infectz de peste doiuent auoir grand esgard à soy preseruer de peur de prédre le mal. Et en premier lieu doiuent se retirer à Dieu, le suppliant les vouloir preseruer, afin qu'est antz ainfi par la grace de Dieu preseruez, ilz puissent mieux accomplir l'office de charité à l'endroit de leur malade, pour le secourir & seruir de tout son pouuoir: ce qu'à Dieu est fort agreable & plaisant, donc s'uyuât l'ordre escript

escript au chapitres second, troisieme, quatrieme, & cinquieme, de ce traicté, il vsera des preseruatifz illec escriptz selon la complexion, aage, vertu, & nature des humeurs abondantz en luy. prenant medecines ou pillules appropriees, poudres, oppiates, tablettes contre peste, theriaque ou metridat, selon la forme que nous auons donnee es lieux allegués, & ce cōtinuant sans intermission.

Quand il visitera son malade, il ne s'approchera pres de luy par trop, pour ne recepuoir son haleine, ains s'en tiendra esloigné au plus qu'il luy sera possible, mesmes à ieun. Aussi au parauant qu'entrer à la chambre du malade, principalement le matin, fera esuêter la chambre, ouurir les fenestres quelque temps auant qu'il y entre, fera arroser la chambre d'eau & vinaigre, & y faire

y faire bon feu quelque temps que ce soit, ou en Esté, mediocre de sermens de vigne, de romarin ou genre. Perfumer la chambre des perfums deuāt ditz au regime preseruatif.

En entrant à la chambre du malade il tiendra en ses mains vne torche ou plusieurs chandelles de cire bien allumées ou eschaufettes pleines de bonne & viue brase, y mettant aucun des perfums dessus escriptz. Il tiendra en sa bouche racine d'angelique, ou Zedoaire, ou vn clou de girofle, ou de l'escorce de citron, orange, ou limon. Se lauera les mains, le visaige, & le front, les temples, de bõ vinaigre meslé avec eau rose ou eau simple, & s'il a le moyē il s'en frotter a la poytrine & les lieux des emonctoires: mais cela n'est pas trop seur ny aisé à faire. Changera souuent & presque tous les

les iours d'habillemens & chemise, tiendra en ses mains, pommes, oranges, limons pour les sentir souvent.

Tiendra vne esponge trempée en liqueur d'eau rose, vinaigre rosat, vin blanc, meslés ensemble avec poudre de girofle de zedoaire & angelique. Laquelle odorera souvent & d'icelle liqueur en tiendra à la bouche & en arrousera le gosier. Parfumera toute la maison & chambre du malade deux ou trois fois le iour, & plus en Esté, pour estre les iours longz.

Quand il viendra toucher le malade luy fera tourner le visage en arriere, affin que l'alaine ne luy coure sus. Et celluy q fait cest office d'attoucher le malade, tournera aussi le visage arriere par mesme fin de ne receuoir l'infection. Se tiendra net, en ses habitz souuēt remuez, se purg

purgera souuent avec les pillules  
contre peste, ou autre médicament  
approprié. Sera sobre en son viure,  
se gardant de superfluité de viādes,  
& de boire. Se tiendra ioyeux, & en  
bon espoir : chassera de soy toute  
crainte, peur, tristesse, melancholie.  
Car ceux qui sont en cest affaire  
plus idoines sont les gens de bon  
cœur, allegres, plaisantz & bien  
complexionnés, qui mesprisent le  
danger de la mort, & sont addrois à  
faire seruice mesme aux pere & me-  
re, enfans, femme, freres & seurs,  
& leurs amis. Ce sone ceux en veri-  
té qui en tel cas portent moins de  
dāger, & ausquelz Dieu voyāt leur  
bon zele pouruoit de sa misericor-  
de, les preseruant de si grand dāger.  
Mais aussi en ce fait ne faut estre te-  
meraire ny trop facile, ny se fier à  
sa cōplexiō, ieunesse, vertu, ny force  
de

de corps. Car à cachettes la malignité du venin pestilentiel rompt tout cela, & si tu n'es caut & pruden, te saisira quand tu penseras estre plus sain: d'autant que longuement tel venin accoustume se tenir caché dās le corps sans faire aucune, ou à tout le moins notable impression: si comme le venin de la morsure du chien enragé, & tout soubdain sans t'en donner garde se descouure, & fait mortelle impression. Parquoy ne faut estre si audacieux & temeraire de t'exposer si facilement à telz perilz si la necessité ne t'y cōtrainct pour secourir tes parens ou fidelles amys, ausquelz par deuoir de nature tu ne puisses faillir. Ne aussi par le contraire te faut estre si timide, que pour peur de la mort tu delaisses tes pere, mere, femme ou enfans sans secours: ains par le commandement de Dieu & loy de nature tu y doibs



doibs employer tout ton pouuoir, mesme ton sang & ta propre vie, pour la conseruer à ceux qui après Dieu, la t'ont donnée, te donnant l'essence & vie tout à vn coup.

## LA MANIERE DE

nettoyer les maisons & lieux infectz, les vestemens de laine & toyle, les meubles des maisons infectes. Et combien de temps peuvent demeurer infectz, s'il ne sont bien nettoyés, euentés, & purgés, & dans quel temps ce faisant l'on les peut rendre hors d'infection,

## CHAP. XVII.



**N**OUS auons dit au premier chapitre de ce traité, la peste estre maladie contagieuse, par sa malignité rauissant la vie. & par ce que

n la

la contagion d'icelle ( qui n'est autre chose sinon pareille disposition par vn certain cōsentement occulte communiquée par attouchement à autrui ) demeure longuement cachée és choses qui la peuuent recevoir, comme sont l'air de la maison infecte, les parois, vestemens de laine, drap, linge, coton, plume, bourre, il est necessaire de bien scauoir nettoyer les maisons de ceux qui ont esté infectz de peste, pour & aux fins que après la guerison des malades voulans rentrer en leurs maisons ne puissent derechef s'infecter par faute de bien auoir nettoyé leurs habillemens, couuertes de liēt, coultres, matelas, & vtensilles qui ont serui durant leur maladie. Et pour-ce par maniere d'aueertissement à tous en general vn chacun en tēps de peste doit tenir serrez ses meilleurs meubles en lieu separé,

paré, pur & net. & ne s'en seruir aucunement : le dy retirer linge, tapisserie, couuertes, & ne tenir pour son seruice, sinon les choses necessaires, & desquelles l'on ne se peut passer sans les auoir auprès de soy, de peur que suruenāt quelque mal en la maison, le tout ne soit infect. Car où il y a vn malade pestiferé en vne maison il infecte incontinent l'air où il habite, les accoustremēs, couuertes de liēt, matelas, coultres, linseulx, & toute chose à luy proche qui peut receuoir son alaine, sueur, crachat, soufle & vapeur sortant d'iceluy. Et toutes choses qui ont substance rare & molle, & beaucoup de pores sont idoines à receuoir facilement telle infection, comme laine, linge, coton, & plume. Parquoy faut que ces choses par sus toutes autres soyent soigneusement nettoyees, esuentees, lauees,

purgees. Car elles retiennent longuement l'infection en soy si vne foys sont contaminees : par ce que le venin s'imbibe & incorpore en leur substance vehementemēt, pour l'espongieuſeté & rarité de ces choses. & ſi comme l'huyle, & poix, reſine, graiſſe, nourrissent, conſeruēt & augmentent le feu, luy ſervant de idoyne matiere : tout de meſme la laine, coton, linge, peliſſe, & plume nourrissent & entretiennēt longuement l'infection conceuē du malade peſtiferé, retenantz en ſoy cachee par long eſpace de tēps telle peſtilente vapeur. ſi comme nous voyons que les arches & coffres ou l'on met des bonnes ſenteurs pour entremeller au linge ou accouſtrements, retiennent fort longuement telle odeur quelle eſt de ce que vous y auez mis, comme lauande, roſes, oranges, Ciprés, meſme telle odeur

ſe

se conserue long temps en telz linges ou accoustremens, comme l'expérience nous monstre. Ce qu'aussi nous voyons au coton, où l'on à enueloppé du musc ou de la ciuette, qui garde vne infinité de temps son odeur. Ce que le Poëte Horace *Horace.* à tresbien dit par ces vers,

*Quo semel est imbuta recens seruabit odorem*

*Testa diu.* c'est à dire,  
Le vase longuement gardera  
Telle odeur que mis l'on y aura.

Puis donc que telle infection peut longuement s'arrester cachée es choses susdittes, les faut fort diligemmēt nettoyer en la forme qui s'ensuit: Les accoustremens de drap du malade delquelz il s'est serui à la maladie après la guérison ou mort d'iceluy, deuoyent pour le plus seur estre bruslés, pour ne mettre

autrui en danger : ce qu'en verité est le plus expedient, & ce qu'en Italie accoustument d'observer. Car depuis qu'un malade pestiferé est guery, tout l'accoustrement tant de la personne durant sa maladie, que de son liét, est enleué par les deputez de la santé, & mis au feu en lieu hors la ville esuenté & patent, ou la nuit venue les ministres à ce commis font par le plus souuent tel effect. & tant plus si le malade meurt de celle maladie: vsans de ce moyé, de peur que telle despouille infecte ne porte cōtagion aux suruiuantz. Mais tant y a que tous ne peuvent endurer telle rigueur de perdre à vn coup leur meuble, mesme s'ilz sont pources, & n'ayantz de quoy se fournir de meuble. Parquoy est necessaire à ceux là y pouruoir par autre moyen, qui est de lauer soudainement tous iés habitz, couuer-

tes de liēt, matelas, coultre, non seulement avec eau, ains de forte lessive, & savon, si le patient est riche, & non par vne fois, mais plusieurs, & les faire essuyer au solcil, les mon-  
strer souuent au feu fait de Romarin ou geneure, les esuenter nuiēt & iour à l'air, mesme si le temps est sec & boreal. Car tel vent est merueilleusement bon pour deseicher toute mauuaise vapeur & infection, & les tourner de tous costez, afin qu'ilz prennent l'air & solcil de toutes pars, les parfumer de bonnes senteurs, & ne s'en seruir aucunement d'vn an s'il est possible, car ilz retiennēt l'infection s'ilz ne sont bien lauez & nettoyez plus de trois & quatre ans, mesmes les coultres de plume & matelas, ains iusques à sept ans, comme dessus a esté dict de l'autorité d'Alexāder Benedictus, lequel tesmoigne vne coultre infe-

Et à Venise auoir gardé l'infection  
l'espace de sept ans, & ceux q y cou  
cherent furent incōtinent surprins  
de la peste, à faute d'auoir esté bien  
esuētee, & purgee de l'infection. Et  
notez que les coutres infectes ia  
mais ne se desinfecteront surement  
si toute la plume n'est mise hors, &  
bien semee en lieu aëré, & esuentee  
longuement, & ainsi des matelas de  
laine ou de coton ou bourre, foyez  
auisés. Et s'ilz sont en la maniere  
susditte soigneusement esuentés, la  
ués, perfumés, continuant l'espace  
d'un mois ou quarāte iours, pour  
ront estre purifiés & purgés dans  
cel temps.

L'on doit tous les iours nettoyer  
les membres de la maison, lauer les  
parois, lietz, tables, banchs, sieges  
de bois, d'eau & de vinaigre, les  
frotter roidemēt de peur que nulle  
sordité du malade n'y demeure.

Tenir



Tenir les fenestres ouuertes tout le iour, mesme si le vent boreal tire, les fermant toutesfois au vent marin.

Si l'on tient c'est ordre les meubles de bois pourront estre purgés en vingt & vn iour: car le bois n'est si apte à receuoir infection pour la solidité de sa substance & espaisseur de pores que les vestemens & meubles de laine, coton, pelisse, & autres semblables.

Si le malade à tenu sur soy aucune robbe forcee, c'est la chose de quoy plus se faut contregarder de manier ou vestir, que de nul autre chose: dautant que le poil pour sa chaleur & spongiosité cōserue plus l'infection que nul autre habit. Ce que par Hieronymus Tracastorius en son liure de contagion, troyisième chapitre, est doctement tesmoigné. disant qu'à Verone en lan 1511

n s estant

estât suruenue vne cruelle peste qui  
rauit biē dix mille personnes, d'une  
seule robbe fourree & infecte ve-  
stue par plusieurs moururent vingt  
cinq Allemas, qui tous la vestirent  
l'un après l'autre, iusques qu'à la  
fin estant aduertis d'oū le mal leur  
venoit, firent bruler la robbe.

Les hommes qui ont conuersé  
auec les malades peñsiférés, s'il y  
ont longuement aïsisté, comme le  
Chirurgien ordonné pour la peste,  
le ministre, seruiteurs & chambre-  
res, peuuent demeurer infectz par  
l'espace de soixante iours, n'ayant  
eux esté frappez: & deuant ce temps  
n'est bon n'y assésuré les hantes qu'  
dōner entree. mesme si la peste a du-  
ré longuement. Mais si après auoir  
seruy iūz se font bien purger & es-  
uenter en lieu sain, prenans reme-  
des contre ce mal, pourront estre  
netz en quarante iours. Il faut se

garder de manier nulle chose qui ait esté touchée du malade, all. uoir meuble de liēt & de table, que l'on ait employé à son seruice. car tout cela est infect & contagieux, & gardant en soy longuement le venin: & par-ce ne les faut toucher ou s'en seruir aucunement.

Et sur ce propos l'on demande si l'or & argent manié par vn malade pestiferé, peut estre manyé de sains sans danger. A quoy il faut respondre que l'or & argent & nul metal quant est de soy, n'est capable de receuoir ou retenir infection pour la solidité de sa substāce, & dureté d'icelle, & aussi pource que telz metaux n'ont point de pores larges, ains bien fort petitz, serrés, & estroiz, par respect desquelles choses ilz repoussent tout venin: à quoy aide aussi leur froidure naturelle. Parquoy les metaux, & pierres ne  
sont

sont capables d'infection comme bien deduit Tracastorius en son liure de cōtagion quatrième, chapitre premier. Parquoy quād à mon opinion ie ne ferois difficulté receuoir, ou à tout le moins manier l'or ou argent d'vn pestiferé : pourueu toutesfois q̄ l'on ne manie la bourse, gibeciere, ou linge où ledit argēt auroit esté, & que l'on ne reçoie l'halaine du malade. Car en verité l'or & argent par les raisons suddites ne portēt avec soy infection, & ne peuuent la donner à autrui : sauf qu'il y eust quelque gresse ou sordité en eux attaquée du malade. Et pource aux gens timides est plus seur ne les toucher ny manier. Et pour plus grande asseurâce, est fort bon en tel cas mettre l'argent dans vn bassin ou autre vase avec de vinaigre, & le laisser la trois ou quatre iours à l'air pourueu q̄ soit en lieu

esloigné de larrons. Car telle marchandise est plustost subiette au danger & infection des larrons que de peste. Et pour estre en plus brief tēps purgé d'infection, il faut viure sobremēt, se purger souuēt, prēdre les remedes preseruatifz cy dessus ditz. Se tenir ioyeux & allegre, sans aucune crainte ou peur. Car l'allegresse cōforte l'espritvital du cœur, comme dit Auicenne au liure des force du cœur & iceluy conforté & fortifié, se reuenche & resiste mieux contre le venin, l'air infect, & vapeur contagieux.

Si tu obserue ces preceptes tu pourras avec l'ayde de Dieu cūter tout danger de peste tenant l'ordre que dessus, par moyen duquel ny aura humeurs capables d'infectiō, & la où il n'y a matiere idoine pour receuoir infection, elle ne si peut attaquer.

## REIGLE GENERALE

le à observer à tous pour se con-  
tregarder de n'en courir  
la peste en temps  
suspect,

## CHAP. XVIII.



L faut en premier lieu  
inuoquer l'ayde & gra-  
ce de Dieu, le priât nous  
vouloir guaratir par sa  
bonté & misericorde. En secôd lieu  
fuyr la conuersation des gens, &  
principalement à ieun, tant qu'il est  
possible. & se tenir loing de ceux  
à qui l'on parle, & non pres de leur  
halaine, ains au large & en lieu  
libre & bien aéré, & non au So-  
leil.

Si tu es cōtrainct parler à person-

nes infectes, soys esloigné d'eux pour le moins dix ou douze pas, & quād plus lōg seras, tāt mieux fera, te tiēdras en lieu large, & sur vēt qui souffle de toy à l'infect, & non au cōtraire. & soit entre toy & l'infect le soleil ou feu, ou parfums de bonnes odeurs, & tiendras en la main oranges, limōs, pommes de senteur, & en la bouche Zedoaire, Angeli- que, ou escoree de citron, ou oran- ge, ou vne iacynthe, & feras court sans long propos. Euites les lieux estroict, mal esuentés, fuyr les assem- blees des gens, lesquelles en temps suspect doiuent estre deffendues, comme danses, Bateleurs, festins, & toute autre chose qui fait assem- bler le peuple, sauf le seruice de Dieu qu'il ne faut onc delaisser.

Mais le plus seur & souverain remede pour euites tous inconue-  
niens,

niens, est fuyr tost, & loing, & re-  
tourner tard. Voila l'obseruation  
& reiglement general pour  
tous. Dieu soit le pro-  
tecteur & garde  
de tous.

\*\*\*

